

# ISAIÆ

|            |    |    |    |    |    |    |    |    |    |    |    |    |    |    |    |    |    |    |
|------------|----|----|----|----|----|----|----|----|----|----|----|----|----|----|----|----|----|----|
| Capitulum: | 1  | 2  | 3  | 4  | 5  | 6  | 7  | 8  | 9  | 10 | 11 | 12 | 13 | 14 | 15 | 16 |    |    |
| 17         | 18 | 19 | 20 | 21 | 22 | 23 | 24 | 25 | 26 | 27 | 28 | 29 | 30 | 31 | 32 | 33 | 34 | 35 |
| 36         | 37 | 38 | 39 | 40 | 41 | 42 | 43 | 44 | 45 | 46 | 47 | 48 | 49 | 50 | 51 | 52 | 53 | 54 |
| 55         | 56 | 57 | 58 | 59 | 60 | 61 | 62 | 63 | 64 | 65 | 66 |    |    |    |    |    |    |    |

## CAPITULUM 1

**V**isio Isaiae filii Amos quam vidit super Iudam et Hierusalem in diebus Oziae Ioatham Ahaz Ezechiae regum Iuda

**2** audite caeli et auribus percipe terra quoniam Dominus locutus est filios enutrivisti et exaltasti ipsi autem spreverunt me

**3** cognovit bos possessorem suum et asinus praesepe domini sui Israhel non cognovit populus meus non intellexit

**4** vae genti peccatrici populo gravi iniquitate semini nequam filiis sceleratis dereliquerunt Dominum blasphemaverunt Sanctum Israhel abalienati sunt retrorsum

**5** super quo percutiam vos ultra addentes praevaricationem omne caput languidum et omne cor maerens

**6** a planta pedis usque ad verticem non est in eo sanitas vulnus et livor et plaga tumens non est circumligata nec curata medicamine neque fota oleo

**7** terra vestra deserta civitates vestrae succensae igni regionem vestram coram vobis alieni devorant et desolabitur sicut in vastitate hostili

**8** et derelinquetur filia Sion ut umbraculum in vinea et sicut tugurium in cucumerario sicut civitas quae vastatur

**9** nisi Dominus exercituum reliquisset nobis semen quasi Sodoma fuissetis et quasi Gomorra similes essemus

**10** audite verbum Domini principes Sodomorum percipite auribus legem Dei nostri populus Gomorrae

**11** quo mihi multitudinem victimarum vestrarum dicit Dominus plenus sum holocausta arietum et adipem pinguium et sanguinem vitulorum et agnorum et hircorum nolui

**12** cum veneritis ante conspectum meum quis quaesivit haec de manibus vestris ut ambularetis in atriis meis

**13** ne adferatis ultra sacrificium frustra incensum abominatio est mihi neomeniam et sabbatum et festivitates alias non feram iniqui sunt coetus vestri

**14** kalendas vestras et sollemnitates vestras odit anima mea facta sunt mihi molesta laboravi sustinens

**15** et cum extenderitis manus vestras avertam oculos meos a vobis et cum multiplicaveritis orationem non audiam manus vestrae sanguine plenae sunt

- 16** lavamini mundi estote auferte malum cogitationum vestrarum ab oculis meis quiescite agere perverse
- 17** discite benefacere quaerite iudicium subvenite oppresso iudicate pupillo defendite viduam
- 18** et venite et arguite me dicit Dominus si fuerint peccata vestra ut coccinum quasi nix dealbabuntur et si fuerint rubra quasi vermiculus velut lana erunt
- 19** si volueritis et audieritis bona terrae comedetis
- 20** quod si nolueritis et me provocaveritis ad iracundiam gladius devorabit vos quia os Domini locutum est
- 21** quomodo facta est meretrix civitas fidelis plena iudicii iustitia habitavit in ea nunc autem homicidae
- 22** argentum tuum versum est in scoriam vinum tuum mixtum est aqua
- 23** principes tui infideles socii furum omnes diligunt munera sequuntur retributiones pupillo non iudicant et causa viduae non ingreditur ad eos
- 24** propter hoc ait Dominus exercituum Fortis Israhel heu consolabor super hostibus meis et vindicabor de inimicis meis
- 25** et convertam manum meam ad te et excoquam ad purum scoriam tuam et auferam omne stagnum tuum
- 26** et restituam iudices tuos ut fuerunt prius et consiliarios tuos sicut antiquitus post haec vocaberis civitas iusti urbs fidelis
- 27** Sion in iudicio redimetur et reducent eam in iustitia
- 28** et conteret scelestos et peccatores simul et qui dereliquerunt Dominum consumentur
- 29** confundentur enim ab idolis quibus sacrificaverunt et erubescetis super hortis quos elegeratis
- 30** cum fueritis velut quercus defluentibus foliis et velut hortus absque aqua
- 31** et erit fortitudo vestra ut favilla stuppae et opus vestrum quasi scintilla et succendetur utrumque simul et non erit qui extinguat

## CAPITULUM 2

**V**erbum quod vidit Isaias filius Amos super Iudam et Hierusalem

- 2** et erit in novissimis diebus praeparatus mons domus Domini in vertice montium et elevabitur super colles et fluent ad eum omnes gentes
- 3** et ibunt populi multi et dicent venite et ascendamus ad montem Domini et ad domum Dei Iacob et docebit nos vias suas et ambulabimus in semitis eius quia de Sion exibat lex et verbum Domini de Hierusalem
- 4** et iudicabit gentes et arguet populos multos et conflabunt gladios suos in vomeres et lanceas suas in falces non levabit gens contra gentem gladium nec exercebuntur ultra ad proelium
- 5** domus Iacob venite et ambulemus in lumine Domini
- 6** proiecisti enim populum tuum domum Iacob quia repleti sunt ut olim et augures habuerunt ut Philisthim et pueris alienis adheserunt
- 7** repleta est terra argento et auro et non est finis thesaurorum eius
- 8** et repleta est terra eius equis et innumerabiles quadrigae eius et repleta est terra eius idolis opus manuum suarum adoraverunt quod fecerunt digiti eorum

- <sup>9</sup> et incurvavit se homo et humiliatus est vir ne ergo dimittas eis
- <sup>10</sup> ingredi in petram abscondere fossa humo a facie timoris Domini et a gloria maiestatis eius
- <sup>11</sup> oculi sublimis hominis humiliati sunt et incurvabitur altitudo virorum exaltabitur autem Dominus solus in die illa
- <sup>12</sup> quia dies Domini exercituum super omnem superbum et excelsum et super omnem arrogantem et humiliabitur
- <sup>13</sup> et super omnes cedros Libani sublimes et erectas et super omnes quercus Basan
- <sup>14</sup> et super omnes montes excelsos et super omnes colles elevatos
- <sup>15</sup> et super omnem turrem excelsam et super omnem murum munitum
- <sup>16</sup> et super omnes naves Tharsis et super omne quod visu pulchrum est
- <sup>17</sup> et incurvabitur sublimitas hominum et humiliabitur altitudo virorum et elevabitur Dominus solus in die illa
- <sup>18</sup> et idola penitus conterentur
- <sup>19</sup> et introibunt in speluncas petrarum et in voragines terrae a facie formidinis Domini et a gloria maiestatis eius cum surrexerit percutere terram
- <sup>20</sup> in die illa proiciet homo idola argenti sui et simulacra auri sui quae fecerat sibi ut adoraret talpas et vespertiliones
- <sup>21</sup> et ingredietur fissuras petrarum et cavernas saxorum a facie formidinis Domini et a gloria maiestatis eius cum surrexerit percutere terram
- <sup>22</sup> quiescite ergo ab homine cuius spiritus in naribus eius quia excelsus reputatus est ipse

### CAPITULUM 3

- E**cce enim Dominator Deus exercituum auferet ab Hierusalem et ab Iuda validum et fortem omne robur panis et omne robur aquae
- <sup>2</sup> fortem et virum bellatorem iudicem et prophetam et ariolum et senem
- <sup>3</sup> principem super quinquaginta et honorabilem vultu et consiliarium sapientem de architectis et prudentem eloquii mystici
- <sup>4</sup> et dabo pueros principes eorum et effeminati dominabuntur eis
- <sup>5</sup> et inruet populus vir ad virum unusquisque ad proximum suum tumultuabitur puer contra senem et ignobilis contra nobilem
- <sup>6</sup> adprehendet enim vir fratrem suum domesticum patris sui vestimentum tibi est princeps esto noster ruina autem haec sub manu tua
- <sup>7</sup> respondebit in die illa dicens non sum medicus et in domo mea non est panis neque vestimentum nolite constituere me principem populi
- <sup>8</sup> ruit enim Hierusalem et Iudas concidit quia lingua eorum et adinventiones eorum contra Dominum ut provocarent oculos maiestatis eius
- <sup>9</sup> agnitio vultus eorum respondit eis et peccatum suum quasi Sodomae praedicaverunt nec absconderunt vae animae eorum quoniam reddita sunt eis mala
- <sup>10</sup> dicite iusto quoniam bene quoniam fructum adinventionum suarum comedet
- <sup>11</sup> vae impio in malum retributio enim manuum eius fiet ei
- <sup>12</sup> populum meum exactores sui spoliaverunt et mulieres dominatae sunt eius popule meus qui beatum te dicunt ipsi te decipiunt et viam gressuum tuorum dissipant
- <sup>13</sup> stat ad iudicandum Dominus et stat ad iudicandos populos

- <sup>14</sup> Dominus ad iudicium veniet cum senibus populi sui et principibus eius vos enim depasti estis vineam meam et rapina pauperis in domo vestra
- <sup>15</sup> quare adteritis populum meum et facies pauperum commolitis dicit Dominus Deus exercituum
- <sup>16</sup> et dixit Dominus pro eo quod elevatae sunt filiae Sion et ambulaverunt extento collo et nutibus oculorum ibant et plaudebant ambulabant et in pedibus suis conposito gradu incedebant
- <sup>17</sup> decalvabit Dominus verticem filiarum Sion et Dominus crinem earum nudabit
- <sup>18</sup> in die illa auferet Dominus ornatum calciamentorum et lunulas
- <sup>19</sup> et torques et monilia et armillas et mitras
- <sup>20</sup> discriminalia et periscelidas et murenulas et olfactoriola et inaures
- <sup>21</sup> et anulos et gemmas in fronte pendentes
- <sup>22</sup> et mutatoria et pallia et linteamina et acus
- <sup>23</sup> et specula et sindones et vittas et theristra
- <sup>24</sup> et erit pro suavi odore fetor et pro zona funiculus et pro crispanti crine calvitium et pro fascia pectorali cilicium
- <sup>25</sup> pulcherrimi quoque viri tui gladio cadent et fortes tui in proelio
- <sup>26</sup> et maerebunt atque lugebunt portae eius et desolata in terra sedebit

## CAPITULUM 4

- E**t adprehendent septem mulieres virum unum in die illa dicentes panem nostrum comedemus et vestimentis nostris operiemur tantummodo vocetur nomen tuum super nos aufer obprobrium nostrum
- <sup>2</sup> in die illa erit germen Domini in magnificentia et in gloria et fructus terrae sublimis et exultatio his qui salvati fuerint de Israhel
- <sup>3</sup> et erit omnis qui relictus fuerit in Sion et residuus in Hierusalem sanctus vocabitur omnis qui scriptus est in vita in Hierusalem
- <sup>4</sup> si abluerit Dominus sordem filiarum Sion et sanguinem Hierusalem laverit de medio eius spiritu iudicii et spiritu ardoris
- <sup>5</sup> et creabit Dominus super omnem locum montis Sion et ubi invocatus est nubem per diem et fumum et splendorem ignis flammantis in nocte super omnem enim gloriam protectio
- <sup>6</sup> et tabernaculum erit in umbraculum diei ab aestu et in securitatem et absconsionem a turbine et a pluvia

## CAPITULUM 5

- C**antabo dilecto meo canticum patruelis mei vineae suae vinea facta est dilecto meo in cornu filio olei
- <sup>2</sup> et sepivit eam et lapides elegit ex illa et plantavit eam electam et aedificavit turrem in medio eius et torcular extruxit in ea et expectavit ut faceret uvas et fecit labruscas
- <sup>3</sup> nunc ergo habitator Hierusalem et vir Iuda iudicate inter me et inter vineam meam
- <sup>4</sup> quid est quod debui ultra facere vineae meae et non feci ei an quod expectavi ut faceret uvas et fecit labruscas

<sup>5</sup> et nunc ostendam vobis quid ego faciam vineae meae auferam sepem eius et erit in direptionem diruam maceriam eius et erit in conculcationem

<sup>6</sup> et ponam eam desertam non putabitur et non fodietur et ascendent vepres et spinae et nubibus mandabo ne pluant super eam imbrem

<sup>7</sup> vinea enim Domini exercituum domus Israhel et vir Iuda germen delectabile eius et expectavi ut faceret iudicium et ecce iniquitas et iustitiam et ecce clamor

<sup>8</sup> vae qui coniungitis domum ad domum et agrum agro copulatis usque ad terminum loci numquid habitabitis soli vos in medio terrae

<sup>9</sup> in auribus meis sunt haec Domini exercituum nisi domus multae desertae fuerint grandes et pulchrae absque habitatore

<sup>10</sup> decem enim iuga vinearum facient lagunculam unam et triginta modii sementis facient modios tres

<sup>11</sup> vae qui consurgitis mane ad ebrietatem sectandam et potandum usque ad vesperam ut vino aestuetis

<sup>12</sup> cithara et lyra et tympanum et tibia et vinum in conviviis vestris et opus Domini non respicitis nec opera manuum eius consideratis

<sup>13</sup> propterea captivus ductus est populus meus quia non habuit scientiam et nobiles eius interierunt fame et multitudo eius siti exaruit

<sup>14</sup> propterea dilatavit infernus animam suam et aperuit os suum absque ullo termino et descendent fortes eius et populus eius et sublimes gloriosique eius ad eum

<sup>15</sup> et incurvabitur homo et humiliabitur vir et oculi sublimium deprimentur

<sup>16</sup> et exaltabitur Dominus exercituum in iudicio et Deus sanctus sanctificabitur in iustitia

<sup>17</sup> et pascentur agni iuxta ordinem suum et deserta in ubertatem versa advenae comedent

<sup>18</sup> vae qui trahitis iniquitatem in funiculis vanitatis et quasi vinculum plaustri peccatum

<sup>19</sup> qui dicitis festinet et cito veniat opus eius ut videamus et adpropiet et veniat consilium Sancti Israhel et sciemus illud

<sup>20</sup> vae qui dicitis malum bonum et bonum malum ponentes tenebras lucem et lucem tenebras ponentes amarum in dulce et dulce in amarum

<sup>21</sup> vae qui sapientes estis in oculis vestris et coram vobismet ipsis prudentes

<sup>22</sup> vae qui potentes estis ad bibendum vinum et viri fortes ad miscendam ebrietatem

<sup>23</sup> qui iustificatis impium pro muneribus et iustitiam iusti aufertis ab eo

<sup>24</sup> propter hoc sicut devorat stipulam lingua ignis et calor flammae exurit sic radix eorum quasi favilla erit et germen eorum ut pulvis ascendet abiecerunt enim legem Domini exercituum et eloquium Sancti Israhel blasphemaverunt

<sup>25</sup> ideo iratus est furor Domini in populo suo et extendit manum suam super eum et percussit eum et conturbati sunt montes et facta sunt morticina eorum quasi stercus in medio platearum in omnibus his non est aversus furor eius sed adhuc manus eius extenta

<sup>26</sup> et levabit signum nationibus procul et sibilabit ad eum de finibus terrae et ecce festinus velociter veniet

<sup>27</sup> non est deficiens neque laborans in eo non dormitabit neque dormiet neque solvetur cingulum renum eius nec rumpetur corrigia calciamenti eius

<sup>28</sup> sagittae eius acutae et omnes arcus eius extenti ungulae equorum eius ut silex et rotae eius quasi impetus tempestatis

<sup>29</sup> rugitus eius ut leonis rugiet ut catuli leonum et frendet et tenebit praedam et

amplexabitur et non erit qui eruat

<sup>30</sup> et sonabit super eum in die illa sicut sonitus maris aspiciemus in terram et ecce tenebrae tribulationis et lux obtenebrata est in caligine eius

## CAPITULUM 6

**I**n anno quo mortuus est rex Ozias vidi Dominum sedentem super solium excelsum et elevatum et ea quae sub eo erant implebant templum

<sup>2</sup> seraphin stabant super illud sex alae uni et sex alae alteri duabus velabant faciem eius et duabus velabant pedes eius et duabus volabant

<sup>3</sup> et clamabant alter ad alterum et dicebant sanctus sanctus sanctus Dominus exercituum plena est omnis terra gloria eius

<sup>4</sup> et commota sunt superliminaria cardinum a voce clamantis et domus impleta est fumo

<sup>5</sup> et dixi vae mihi quia tacui quia vir pollutus labiis ego sum et in medio populi polluta labia habentis ego habito et Regem Dominum exercituum vidi oculis meis

<sup>6</sup> et volavit ad me unus de seraphin et in manu eius calculus quem forcipe tulerat de altari

<sup>7</sup> et tetigit os meum et dixit ecce tetigit hoc labia tua et auferetur iniquitas tua et peccatum tuum mundabitur

<sup>8</sup> et audiui vocem Domini dicentis quem mittam et quis ibit nobis et dixi ecce ego sum mitte me

<sup>9</sup> et dixit vade et dices populo huic audite audientes et nolite intellegere et videte visionem et nolite cognoscere

<sup>10</sup> excaeca cor populi huius et aures eius adgrava et oculos eius claude ne forte videat oculis suis et auribus suis audiat et corde suo intellegat et convertatur et sanem eum

<sup>11</sup> et dixi usquequo Domine et dixit donec desolentur civitates absque habitatore et domus sine homine et terra relinquetur deserta

<sup>12</sup> et longe faciet Dominus homines et multiplicabitur quae derelicta fuerat in medio terrae

<sup>13</sup> et adhuc in ea decimatio et convertetur et erit in ostensionem sicut terebinthus et sicuti quercus quae expandit ramos suos semen sanctum erit id quod steterit in ea

## CAPITULUM 7

**E**t factum est in diebus Ahaz filii Ioatham filii Oziae regis Iuda ascendit Rasin rex Syriae et Phacee filius Romeliae rex Israhel in Hierusalem ad proeliandum contra eam et non potuerunt debellare eam

<sup>2</sup> et nuntiaverunt domui David dicentes requievit Syria super Ephraim et commotum est cor eius et cor populi eius sicut moventur ligna silvarum a facie venti

<sup>3</sup> et dixit Dominus ad Isaïam egredere in occursum Ahaz tu et qui derelictus est Iasub filius tuus ad extremum aquaeductus piscinae superioris in via agri Fullonis

<sup>4</sup> et dices ad eum vide ut sileas noli timere et cor tuum ne formidet a duobus caudis titionum fumigantium istorum in ira furoris Rasin et Syriae et filii Romeliae

<sup>5</sup> eo quod consilium inierit contra te Syria malum Ephraim et filius Romeliae dicentes

<sup>6</sup> ascendamus ad Iudam et suscitemus eum et avellamus eum ad nos et ponamus regem in medio eius filium Tabeel

<sup>7</sup> haec dicit Dominus Deus non stabit et non erit istud

<sup>8</sup> sed caput Syriae Damascus et caput Damasci Rasin et adhuc sexaginta et quinque anni et desinet Ephraim esse populus

<sup>9</sup> et caput Ephraim Samaria et caput Samariae filius Romeliae si non credideritis non permanebitis

<sup>10</sup> et adiecit Dominus loqui ad Ahaz dicens

<sup>11</sup> pete tibi signum a Domino Deo tuo in profundum inferni sive in excelsum supra

<sup>12</sup> et dixit Ahaz non petam et non temptabo Dominum

<sup>13</sup> et dixit audite ergo domus David numquid parum vobis est molestos esse hominibus quia molesti estis et Deo meo

<sup>14</sup> propter hoc dabit Dominus ipse vobis signum ecce virgo concipiet et pariet filium et vocabitis nomen eius Emmanuhel

<sup>15</sup> butyrum et mel comedet ut sciat reprobare malum et eligere bonum

<sup>16</sup> quia antequam sciat puer reprobare malum et eligere bonum derelinquetur terra quam tu detestaris a facie duum regum suorum

<sup>17</sup> adducet Dominus super te et super populum tuum et super domum patris tui dies qui non venerunt a diebus separationis Ephraim a Iuda cum rege Assyriorum

<sup>18</sup> et erit in die illa sibilabit Dominus muscae quae est in extremo fluminum Aegypti et api quae est in terra Assur

<sup>19</sup> et venient et requiescent omnes in torrentibus vallium et cavernis petrarum et in omnibus fructibus et in universis foraminibus

<sup>20</sup> in die illa radet Dominus in novacula conducta in his qui trans Flumen sunt in rege Assyriorum caput et pilos pedum et barbam universam

<sup>21</sup> et erit in die illa nutriet homo vaccam boum et duas oves

<sup>22</sup> et prae ubertate lactis comedet butyrum butyrum enim et mel manducabit omnis qui relictus fuerit in medio terrae

<sup>23</sup> et erit in die illa omnis locus ubi fuerint mille vites mille argenteis et in spinas et in vepres erunt

<sup>24</sup> cum sagittis et arcu ingredientur illuc vepres enim et spinae erunt in universa terra

<sup>25</sup> et omnes montes qui in sarculo sariantur non veniet illuc terror spinarum et veprium et erit in pascua bovis et in conculcationem pecoris

## CAPITULUM 8

**E**t dixit Dominus ad me sume tibi librum grandem et scribe in eo stilo hominis Velociter spolia detrahe Cito praedare

<sup>2</sup> et adhibui mihi testes fideles Uriam sacerdotem et Zacchariam filium Barachiae

<sup>3</sup> et accessi ad prophetissam et concepit et peperit filium et dixit Dominus ad me voca nomen eius Adcelera spolia detrahare Festina praedari

<sup>4</sup> quia antequam sciat puer vocare patrem suum et matrem suam auferetur fortitudo Damasci et spolia Samariae coram rege Assyriorum

<sup>5</sup> et adiecit Dominus loqui ad me adhuc dicens

<sup>6</sup> pro eo quod abiecit populus iste aquas Siloae quae vadunt cum silentio et adsumpsit magis Rasin et filium Romeliae

<sup>7</sup> propter hoc ecce Dominus adducet super eos aquas Fluminis fortes et multas regem Assyriorum et omnem gloriam eius et ascendet super omnes rivos eius et fluet super

universas ripas eius

<sup>8</sup> et ibit per ludam inundans et transiens usque ad collum veniet et erit extensio alarum eius implens latitudinem terrae tuae o Emmanuhel

<sup>9</sup> congregamini populi et vincimini et audite universae procul terrae confortamini et vincimini accingite vos et vincimini

<sup>10</sup> inite consilium et dissipabitur loquimini verbum et non fiet quia nobiscum Deus

<sup>11</sup> haec enim ait Dominus ad me sicut in forti manu erudit me ne irem in via populi huius dicens

<sup>12</sup> non dicatis coniuratio omnia enim quae loquitur populus iste coniuratio est et timorem eius ne timeatis neque paveatis

<sup>13</sup> Dominum exercituum ipsum sanctificate ipse pavor vester et ipse terror vester

<sup>14</sup> et erit vobis in sanctificationem in lapidem autem offensionis et in petram scandali duabus domibus Israhel in laqueum et in ruinam habitantibus Hierusalem

<sup>15</sup> et offendent ex eis plurimi et cadent et conterentur et inretientur et capientur

<sup>16</sup> liga testimonium signa legem in discipulis meis

<sup>17</sup> et expectabo Dominum qui abscondit faciem suam a domo iacob et praestolabor eum

<sup>18</sup> ecce ego et pueri quos mihi dedit Dominus in signum et in portentum Israhelis a Domino exercituum qui habitat in monte Sion

<sup>19</sup> et cum dixerint ad vos quaerite a pythonibus et a divinis qui stridunt in incantationibus suis numquid non populus a Deo suo requirit pro vivis a mortuis

<sup>20</sup> ad legem magis et ad testimonium quod si non dixerint iuxta verbum hoc non erit eis matutina lux

<sup>21</sup> et transibit per eam corruet et esuriet et cum esurierit irascetur et maledicet regi suo et Deo suo et suspiciet sursum

<sup>22</sup> et ad terram intuebitur et ecce tribulatio et tenebrae dissolutio angustia et caligo persequens et non poterit avolare de angustia sua

## CAPITULUM 9

**P**rimo tempore adleviata est terra Zabulon et terra Nephtalim et novissimo adgravata est via maris trans Iordanem Galileae gentium

<sup>2</sup> populus qui ambulabat in tenebris vidit lucem magnam habitantibus in regione umbrae mortis lux orta est eis

<sup>3</sup> multiplicasti gentem non magnificasti laetitiam laetabuntur coram te sicut laetantur in messe sicut exultant quando dividunt spolia

<sup>4</sup> iugum enim oneris eius et virgam umeri eius et sceptrum exactoris eius superasti sicut in die Madian

<sup>5</sup> quia omnis violenta praedatio cum tumultu et vestimentum mixtum sanguine erit in combustionem et cibus ignis

<sup>6</sup> parvulus enim natus est nobis filius datus est nobis et factus est principatus super umerum eius et vocabitur nomen eius Admirabilis consiliarius Deus fortis Pater futuri saeculi Princeps pacis

<sup>7</sup> multiplicabitur eius imperium et pacis non erit finis super solium David et super regnum eius ut confirmet illud et corroboret in iudicio et iustitia amodo et usque in sempiternum zelus Domini exercituum faciet hoc

<sup>8</sup> verbum misit Dominus in iacob et cecidit in Israhel



<sup>9</sup> et sciet populus omnis Ephraim et habitantes Samariam in superbia et magnitudine cordis dicentes

<sup>10</sup> lateres ceciderunt sed quadris lapidibus aedificabimus sycomoros succiderunt sed cedros inmutabimus

<sup>11</sup> et elevabit Dominus hostes Rasin super eum et inimicos eius in tumultum vertet

<sup>12</sup> Syriam ab oriente et Philisthim ab occidente et devorabunt Israhel toto ore in omnibus his non est aversus furor eius sed adhuc manus eius extenta

<sup>13</sup> et populus non est reversus ad percutientem se et Dominum exercituum non inquisierunt

<sup>14</sup> et disperdet Dominus ab Israhel caput et caudam incurvantem et refrenantem die una

<sup>15</sup> longevus et honorabilis ipse est caput et propheta docens mendacium ipse cauda est

<sup>16</sup> et erunt qui beatificant populum istum seducentes et qui beatificantur praecipitati

<sup>17</sup> propter hoc super adulescentulis eius non laetabitur Dominus et pupillorum eius et viduarum non miserebitur quia omnis hypocrita est et nequam et universum os locutum est stultitiam in omnibus his non est aversus furor eius sed adhuc manus eius extenta

<sup>18</sup> succensa est enim quasi ignis impietas veprem et spinam vorabit et succendetur in densitate saltus et convolvetur superbia fumi

<sup>19</sup> in ira Domini exercituum conturbata est terra et erit populus quasi esca ignis vir fratri suo non parcat

<sup>20</sup> et declinabit ad dexteram et esuriet et comedet ad sinistram et non saturabitur unusquisque carnem brachii sui vorabit Manasses Ephraim et Ephraim Manassen simul ipsi contra ludam

<sup>21</sup> in omnibus his non est aversus furor eius sed adhuc manus eius extenta

## CAPITULUM 10

**V**ae qui condunt leges iniquas et scribentes iniustitiam scripserunt

<sup>2</sup> ut opprimerent in iudicio pauperes et vim facerent causae humilium populi mei ut essent viduae praeda eorum et pupillos diriperent

<sup>3</sup> quid facietis in die visitationis et calamitatis de longe venientis ad cuius fugietis auxilium et ubi derelinquetis gloriam vestram

<sup>4</sup> ne incurvemini sub vinculo et cum interfectis cadatis super omnibus his non est aversus furor eius sed adhuc manus eius extenta

<sup>5</sup> vae Assur virga furoris mei et baculus ipse in manu eorum indignatio mea

<sup>6</sup> ad gentem fallacem mittam eum et contra populum furoris mei mandabo illi ut auferat spolia et diripiat praedam et ponat illum in conculcationem quasi lutum platearum

<sup>7</sup> ipse autem non sic arbitrabitur et cor eius non ita aestimabit sed ad conterendum erit cor eius et ad internicionem gentium non paucarum

<sup>8</sup> dicet enim

<sup>9</sup> numquid non principes mei simul reges sunt numquid non ut Charchamis sic Chalanno et ut Arfad sic Emath numquid non ut Damascus sic Samaria

<sup>10</sup> quomodo invenit manus mea regna idoli sic et simulacra eorum de Hierusalem et de Samaria

<sup>11</sup> numquid non sicut feci Samariae et idolis eius sic faciam Hierusalem et simulacris eius

<sup>12</sup> et erit cum impleverit Dominus cuncta opera sua in monte Sion et in Hierusalem

visitabo super fructum magnifici cordis regis Assur et super gloriam altitudinis oculorum eius

**13** dixit enim in fortitudine manus meae feci et in sapientia mea intellexi et abstuli terminos populorum et principes eorum deprædatus sum et detraxi quasi potens in sublime residentes

**14** et invenit quasi nidum manus mea fortitudinem populorum et sicut colliguntur ova quæ derelicta sunt sic universam terram ego congregavi et non fuit qui moveret pinnam et aperiret os et ganniret

**15** numquid gloriabitur securis contra eum qui secat in ea aut exaltabitur serra contra eum a quo trahitur quomodo si elevetur virga contra levantem se et exaltetur baculus qui utique lignum est

**16** propter hoc mittet Dominator Deus exercituum in pinguibus eius tenuitatem et subtus gloriam eius succensa ardebit quasi combustio ignis

**17** et erit lumen Israhel in igne et Sanctus eius in flamma et succendetur et devorabitur spina eius et vepres in die una

**18** et gloria saltus eius et Carmeli eius ab anima usque ad carnem consumetur et erit terrore profugus

**19** et reliquiae ligni saltus eius pro paucitate numerabuntur et puer scribet eos

**20** et erit in die illa non adiciet residuum Israhel et hii qui fugerint de domo Iacob inniti super eo qui percutit eos sed innitetur super Dominum Sanctum Israhel in veritate

**21** reliquiae convertentur reliquiae inquam Iacob ad Deum fortem

**22** si enim fuerit populus tuus Israhel quasi harena maris reliquiae convertentur ex eo consummatio abbreviata inundabit iustitiam

**23** consummationem enim et abbreviationem Dominus Deus exercituum faciet in medio omnis terræ

**24** propter hoc hæc dicit Dominus Deus exercituum noli timere populus meus habitator Sion ab Assur in virga percutiet te et baculum suum levabit super te in via Aegypti

**25** adhuc enim paululum modicumque et consummabitur indignatio et furor meus super scelus eorum

**26** et suscitabit super eum Dominus exercituum flagellum iuxta plagam Madian in petra Oreb et virgam suam super mare et levabit eam in via Aegypti

**27** et erit in die illa auferetur onus eius de umero tuo et iugum eius de collo tuo et computrescet iugum a facie olei

**28** veniet in Aiath transibit in Magron apud Machmas commendabit vasa sua

**29** transierunt cursim Gabee sedes nostra obstipuit Rama Gabaath Saulis fugit

**30** hinni voce tua filia Gallim adtende Laisa paupercula Anathoth

**31** migravit Medemena habitatores Gebim confortamini

**32** adhuc dies est ut in Nob stetur agitatit manum suam super montem filiae Sion collem Hierusalem

**33** ecce Dominator Dominus exercituum confringet iagunculam in terrore et excelsi statura succidentur et sublimes humiliabuntur

**34** et subvertentur condensa saltus ferro et Libanus cum excelsis cadet

## CAPITULUM 11

**E**t egredietur virga de radice lesse et flos de radice eius ascendet

<sup>2</sup> et requiescet super eum spiritus Domini spiritus sapientiae et intellectus spiritus consilii et fortitudinis spiritus scientiae et pietatis

<sup>3</sup> et replebit eum spiritus timoris Domini non secundum visionem oculorum iudicabit neque secundum auditum aurium arguet

<sup>4</sup> sed iudicabit in iustitia pauperes et arguet in aequitate pro mansuetis terrae et percutiet terram virga oris sui et spiritu labiorum suorum interficiet impium

<sup>5</sup> et erit iustitia cingulum lumborum eius et fides cinctorium renis eius

<sup>6</sup> habitabit lupus cum agno et pardus cum hedo accubabit vitulus et leo et ovis simul morabuntur et puer parvulus minabit eos

<sup>7</sup> vitulus et ursus pascentur simul requiescent catuli eorum et leo quasi bos comedet paleas

<sup>8</sup> et delectabitur infans ab ubere super foramine aspidis et in caverna reguli qui ablactatus fuerit manum suam mittet

<sup>9</sup> non nocebunt et non occident in universo monte sancto meo quia repleta est terra scientia Domini sicut aquae maris operientes

<sup>10</sup> in die illa radix lesse qui stat in signum populorum ipsum gentes deprecabuntur et erit sepulchrum eius gloriosum

<sup>11</sup> et erit in die illa adiciet Dominus secundo manum suam ad possidendum residuum populi sui quod relinquetur ab Assyriis et ab Aegypto et a Fetros et ab Aethiopia et ab Aelam et a Sennaar et ab Emath et ab insulis maris

<sup>12</sup> et levabit signum in nationes et congregabit profugos Israhel et dispersos Iuda colliget a quattuor plagis terrae

<sup>13</sup> et auferetur zelus Ephraim et hostes Iuda peribunt Ephraim non aemulabitur Iudam et Iudas non pugnabit contra Ephraim

<sup>14</sup> et volabunt in umeros Philisthim per mare simul praedabuntur filios orientis Idumea et Moab praeceptum manus eorum et filii Ammon oboedientes erunt

<sup>15</sup> et desolabit Dominus linguam maris Aegypti et levabit manum suam super Flumen in fortitudine spiritus sui et percutiet eum in septem rivis ita ut transeant per eum calciati

<sup>16</sup> et erit via residuo populo meo qui relinquetur ab Assyriis sicut fuit Israhel in die qua ascendit de terra Aegypti

## CAPITULUM 12

**E**t dices in illa die confitebor tibi Domine quoniam iratus es mihi conversus est furor tuus et consolatus es me

<sup>2</sup> ecce Deus salvator meus fiducialiter agam et non timebo quia fortitudo mea et laus mea Dominus Deus et factus est mihi in salutem

<sup>3</sup> haurietis aquas in gaudio de fontibus salvatoris

<sup>4</sup> et dicetis in illa die confitemini Domino et invocate nomen eius notas facite in populis adinventiones eius mementote quoniam excelsum est nomen eius

<sup>5</sup> cantate Domino quoniam magnifice fecit adnuntiate hoc in universa terra

<sup>6</sup> exulta et lauda habitatio Sion quia magnus in medio tui Sanctus Israhel

## CAPITULUM 13

**O**nus Babylonis quod vidit Isaias filius Amos

<sup>2</sup> super montem caligosum levate signum exaltate vocem levate manum et ingrediantur portas duces

<sup>3</sup> ego mandavi sanctificatis meis et vocavi fortes meos in ira mea exultantes in gloria mea

<sup>4</sup> vox multitudinis in montibus quasi populorum frequentium vox sonitus regum gentium congregatarum Dominus exercituum praecepit militiae belli

<sup>5</sup> venientibus de terra procul a summitate caeli Dominus et vasa furoris eius ut disperdat omnem terram

<sup>6</sup> ululate quia prope est dies Domini quasi vastitas a Domino veniet

<sup>7</sup> propter hoc omnes manus dissolventur et omne cor hominis tabescet

<sup>8</sup> et conteretur tortiones et dolores tenebunt quasi parturiens dolebunt unusquisque ad proximum suum stupebit facies combustae vultus eorum

<sup>9</sup> ecce dies Domini venit crudelis et indignationis plenus et irae furorisque ad ponendam terram in solitudine et peccatores eius conterendos de ea

<sup>10</sup> quoniam stellae caeli et splendor earum non expandent lumen suum obtenebratus est sol in ortu suo et luna non splendet in lumine suo

<sup>11</sup> et visitabo super orbis mala et contra impios iniquitatem eorum et quiescere faciam superbiam infidelium et arrogantiam fortium humiliabo

<sup>12</sup> pretiosior erit vir auro et homo mundo obrizo

<sup>13</sup> super hoc caelum turbabo et movebitur terra de loco suo propter indignationem Domini exercituum et propter diem irae furoris eius

<sup>14</sup> et erit quasi dammula fugiens et quasi ovis et non erit qui congreget unusquisque ad populum suum convertetur et singuli ad terram suam fugient

<sup>15</sup> omnis qui inventus fuerit occidetur et omnis qui supervenerit cadet in gladio

<sup>16</sup> infantes eorum adlident in oculis eorum diripientur domus eorum et uxores eorum violabuntur

<sup>17</sup> ecce ego suscitabo super eos Medos qui argentum non quaerant nec aurum velint

<sup>18</sup> sed sagittis parvulos interficiant et lactantibus uteri non misereantur et super filios non parcat oculus eorum

<sup>19</sup> et erit Babylon illa gloriosa in regnis inclita in superbia Chaldeorum sicut subvertit Deus Sodomam et Gomorram

<sup>20</sup> non habitabitur usque in finem et non fundabitur usque ad generationem et generationem nec ponet ibi tentoria Arabs nec pastores requiescent ibi

<sup>21</sup> sed requiescent ibi bestiae et replebuntur domus eorum draconibus et habitabunt ibi strutiones et pilosi saltabunt ibi

<sup>22</sup> et respondebunt ibi ululae in aedibus eius et sirenae in delubris voluptatis

## CAPITULUM 14

**p**rope est ut veniat tempus eius et dies eius non elongabuntur miserebitur enim Dominus Iacob et eliget adhuc de Israhel et requiescere eos faciet super humum suam adiungetur advena ad eos et adhaerebit domui Iacob

<sup>2</sup> et tenebunt eos populi et adducent eos in locum suum et possidebit eos domus Israhel super terram Domini in servos et ancillas et erunt capientes eos qui se ceperant et subicient exactores suos

<sup>3</sup> et erit in die illa cum requiem dederit tibi Deus a labore tuo et a concussione tua et a servitute dura qua ante servisti

<sup>4</sup> sumes parabolam istam contra regem Babylonis et dices quomodo cessavit exactor quievit tributum

<sup>5</sup> contrivit Dominus baculum impiorum virgam dominantium

<sup>6</sup> caedentem populos in indignatione plaga insanabili subicientem in furore gentes persequentem crudeliter

<sup>7</sup> conqueivit et siluit omnis terra gavisata est et exultavit

<sup>8</sup> abietes quoque laetatae sunt super te et cedri Libani ex quo dormisti non ascendit qui succidat nos

<sup>9</sup> infernus subter conturbatus est in occursum adventus tui suscitavit tibi gigantes omnes principes terrae surrexerunt de solis suis omnes principes nationum

<sup>10</sup> universi respondebunt et dicent tibi et tu vulneratus es sicut nos nostri similis effectus es

<sup>11</sup> detracta est ad inferos superbia tua concidit cadaver tuum subter te sternetur tineae et operimentum tuum erunt vermes

<sup>12</sup> quomodo cecidisti de caelo lucifer qui mane oriebaris corruisti in terram qui vulnerabas gentes

<sup>13</sup> qui dicebas in corde tuo in caelum conscendam super astra Dei exaltabo solium meum sedebo in monte testamenti in lateribus aquilonis

<sup>14</sup> ascendam super altitudinem nubium ero similis Altissimo

<sup>15</sup> verumtamen ad infernum detraheris in profundum laci

<sup>16</sup> qui te viderint ad te inclinabuntur teque prospicient numquid iste est vir qui conturbavit terram qui concussit regna

<sup>17</sup> qui posuit orbem desertum et urbes eius destruxit vinctis eius non aperuit carcerem

<sup>18</sup> omnes reges gentium universi dormierunt in gloria vir in domo sua

<sup>19</sup> tu autem proiectus es de sepulchro tuo quasi stirps inutilis pollutus et obvolutus qui interfecti sunt gladio et descenderunt ad fundamenta laci quasi cadaver putridum

<sup>20</sup> non habebis consortium neque cum eis in sepultura tu enim terram disperdisti tu populum occidisti non vocabitur in aeternum semen pessimorum

<sup>21</sup> praeparate filios eius occisioni in iniquitate patrum eorum non consurgent nec hereditabunt terram neque implebunt faciem orbis civitatum

<sup>22</sup> et consurgam super eos dicit Dominus exercituum et perdam Babylonis nomen et reliquias et germen et progeniem ait Dominus

<sup>23</sup> et ponam eam in possessionem ericii et in paludes aquarum et scopabo eam in scopa terens dicit Dominus exercituum

<sup>24</sup> iuravit Dominus exercituum dicens si non ut putavi ita erit et quomodo mente tractavi

<sup>25</sup> sic eveniet ut conteram Assyrium in terra mea et in montibus meis conculcem eum et auferetur ab eis iugum eius et onus illius ab umero eorum tolletur

<sup>26</sup> hoc consilium quod cogitavi super omnem terram et haec est manus extenta super universas gentes

<sup>27</sup> Dominus enim exercituum decrevit et quis poterit infirmare et manus eius extenta et quis avertet eam

<sup>28</sup> in anno quo mortuus est rex Ahaz factum est onus istud

<sup>29</sup> ne laeteris Philisthea omnis tu quoniam comminuta est virga percussoris tui de radice enim colubri egredietur regulus et semen eius absorbens volucrem

<sup>30</sup> et pascentur primogeniti pauperum et pauperes fiducialiter requiescent et interire faciam in fame radicem tuam et reliquias tuas interficiam  
<sup>31</sup> ulula porta clama civitas prostrata est Philisthea omnis ab aquilone enim fumus venit et non est qui effugiat agmen eius  
<sup>32</sup> et quid respondebitur nuntiis gentis quia Dominus fundavit Sion et in ipsa sperabunt pauperes populi eius

## CAPITULUM 15

**O**nus Moab quia nocte vastata est Ar Moab conticuit quia nocte vastatus est murus Moab conticuit

<sup>2</sup> ascendit domus et Dibon ad excelsa in planctum super Nabo et super Medaba Moab ululabit in cunctis capitibus eius calvitium omnis barba radetur  
<sup>3</sup> in triviis eius accincti sunt sacco super tecta eius et in plateis eius omnis ululat descendit in fletum  
<sup>4</sup> clamavit Esebon et Eleale usque Iasa audita est vox eorum super hoc expediti Moab ululabunt anima eius ululabit sibi  
<sup>5</sup> cor meum ad Moab clamabit vectes eius usque ad Segor vitulam conternantem per ascensum enim Luith flens ascendet et in via Oronaim clamorem contritionis levabunt  
<sup>6</sup> aquae enim Nemrim desertae erunt quia aruit herba defecit germen viror omnis interiit  
<sup>7</sup> secundum magnitudinem operis et visitatio eorum ad torrentem salicum ducent eos  
<sup>8</sup> quoniam circumiit clamor terminum Moab usque ad Gallim ululatus eius et usque ad puteum Helim clamor eius  
<sup>9</sup> quia aquae Dibon repletae sunt sanguine ponam enim super Dibon additamenta his qui fugerint de Moab leonem et reliquiis terrae

## CAPITULUM 16

**E**mitte agnum dominatorem terrae de Petra deserti ad montem filiae Sion

<sup>2</sup> et erit sicut avis fugiens et pulli de nido avolantes sic erunt filiae Moab in transcensu Arnon  
<sup>3</sup> ini consilium coge concilium pone quasi noctem umbram tuam in meridie absconde fugientes et vagos ne prodas  
<sup>4</sup> habitabunt apud te profugi mei Moab esto latibulum eorum a facie vastatoris finitus est enim pulvis consummatus est miser defecit qui conculcabat terram  
<sup>5</sup> et praeparabitur in misericordia solium et sedebit super eum in veritate in tabernaculo David iudicans et quaerens iudicium et velociter reddens quod iustum est  
<sup>6</sup> audivimus superbiam Moab superbus est valde superbia eius et arrogantia eius et indignatio eius plus quam fortitudo eius  
<sup>7</sup> idcirco ululabit Moab ad Moab universus ululabit his qui laetantur super muro cocti lateris loquimini plagas suas  
<sup>8</sup> quoniam suburbana Esebon deserta sunt et vinea Sabama domini gentium exciderunt flagella eius usque ad Iazer pervenerunt erraverunt in deserto propagines eius relictas sunt transierunt mare  
<sup>9</sup> super hoc plorabo in fletu Iazer vineam Sabama inebriabo te lacrima mea Esebon et Eleale quoniam super vindemiam tuam et super messem tuam vox calcantium inruit

- <sup>10</sup> et auferetur laetitia et exultatio de Carmelo et in vineis non exultabit neque iubilabit vinum in torculari non calcabit qui calcare consueverat vocem calcantium abstuli
- <sup>11</sup> super hoc venter meus ad Moab quasi cithara sonabit et viscera mea ad murum cocti lateris
- <sup>12</sup> et erit cum apparuerit quod laboravit Moab super excelsis suis ingredietur ad sancta sua ut obsecret et non valebit
- <sup>13</sup> hoc verbum quod locutus est Dominus ad Moab ex tunc
- <sup>14</sup> et nunc locutus est Dominus dicens in tribus annis quasi anni mercennarii auferetur gloria Moab super omni populo multo et relinquetur parvus et modicus nequaquam multus

## CAPITULUM 17

- O**nus Damasci ecce Damascus desinet esse civitas et erit sicut acervus lapidum in ruina
- <sup>2</sup> derelictae civitates Aroer gregibus erunt et requiescent ibi et non erit qui exterreat
- <sup>3</sup> et cessabit adiutorium ab Ephraim et regnum a Damasco et reliquiae Syriae sicut gloria filiorum Israhel erunt dicit Dominus exercituum
- <sup>4</sup> et erit in die illa adtenuabitur gloria Iacob et pingue carnis eius marcescet
- <sup>5</sup> et erit sicut congregans in messe quod restiterit et brachium eius spicas leget et erit sicut quaerens spicas in valle Rafaim
- <sup>6</sup> et relinquetur in eo sicut racemus et sicut excussio oleae duarum aut trium olivarum in summitate rami sive quattuor aut quinque in cacuminibus eius fructus eius dicit Dominus Deus Israhel
- <sup>7</sup> in die illa inclinabitur homo ad factorem suum et oculi eius ad Sanctum Israhel respicient
- <sup>8</sup> et non inclinabitur ad altaria quae fecerunt manus eius et quae operati sunt digiti eius non respiciet lucos et delubra
- <sup>9</sup> in die illa erunt civitates fortitudinis eius derelictae sicut aratra et segetes quae derelictae sunt a facie filiorum Israhel et erit deserta
- <sup>10</sup> quia oblita es Dei salvatoris tui et Fortis adiutoris tui non es recordata propterea plantabis plantationem fidelem et germen alienum seminabis
- <sup>11</sup> in die plantationis tuae labrusca et mane semen tuum florebit ablata est messis in die hereditatis et dolebit graviter
- <sup>12</sup> vae multitudo populorum multorum ut multitudo maris sonantis et tumultus turbarum sicut sonitus aquarum multarum
- <sup>13</sup> sonabunt populi sicut sonitus aquarum inundantium et increpabit eum et fugiet procul et rapietur sicut pulvis montium a facie venti et sicut turbo coram tempestate
- <sup>14</sup> in tempore vespere et ecce turbatio in matutino et non subsistet haec est pars eorum qui vastaverunt nos et sors diripientium nos

## CAPITULUM 18

- V**ae terrae cymbalo alarum quae est trans flumina Aethiopiae
- <sup>2</sup> qui mittit in mari legatos et in vasis papyri super aquas ite angeli veloces ad gentem convulsam et dilaceratam ad populum terribilem post quem non est alius gentem expectantem expectantem et conculcatam cuius diripuerunt flumina terram eius
- <sup>3</sup> omnes habitatores orbis qui moramini in terra cum elevatum fuerit signum in montibus



videbitis et clangorem tubae audietis

<sup>4</sup> quia haec dicit Dominus ad me quiescam et considerabo in loco meo sicut meridiana lux clara est et sicut nubes roris in die messis

<sup>5</sup> ante messem enim totus effloruit et imatura perfectio germinabit et praecedentur ramusculi eius falcibus et quae derelicta fuerint abscidentur excutientur

<sup>6</sup> et relinquentur simul avibus montium et bestiis terrae et aestate perpetua erunt super eum volucres et omnes bestiae terrae super illum hiemabunt

<sup>7</sup> in tempore illo deferetur munus Domino exercituum a populo divulso et dilacerato a populo terribili post quem non fuit alius a gente expectante expectante et conculcata cuius diripuerunt flumina terram eius ad locum nominis Domini exercituum montem Sion

## CAPITULUM 19

**O**nus Aegypti ecce Dominus ascendet super nubem levem et ingreditur Aegyptum et movebuntur simulacra Aegypti a facie eius et cor Aegypti tabescet in medio eius

<sup>2</sup> et concurrere faciam Aegyptios adversum Aegyptios et pugnabit vir contra fratrem suum et vir contra amicum suum civitas adversus civitatem regnum adversus regnum

<sup>3</sup> et dirumpetur spiritus Aegypti in visceribus eius et consilium eius praecipitabo et interrogabunt simulacra sua et divinos suos et pythones et ariolos

<sup>4</sup> et tradam Aegyptum in manu dominorum crudelium et rex fortis dominabitur eorum ait Dominus Deus exercituum

<sup>5</sup> et arescet aqua de mari et fluvijs desolabitur atque siccabitur

<sup>6</sup> et deficient flumina adtenuabuntur et siccabuntur rivi aggerum calamus et iuncus marcescet

<sup>7</sup> nudabitur alveus rivi a fonte suo et omnis sementis inrigua siccabitur arescet et non erit

<sup>8</sup> et maerebunt piscatores et lugebunt omnes mittentes in flumen hamum et expandentes rete super faciem aquae marcescent

<sup>9</sup> confundentur qui operabantur linum pectentes et texentes subtilia

<sup>10</sup> et erunt inrigua eius flaccientia omnes qui faciebant lacunas ad capiendos pisces

<sup>11</sup> stulti principes Taneos sapientes consiliarii Pharaonis dederunt consilium insipiens quomodo dicetis Pharaoni filius sapientium ego filius regum antiquorum

<sup>12</sup> ubi sunt nunc sapientes tui adnuntient tibi et indicent quid cogitaverit Dominus exercituum super Aegyptum

<sup>13</sup> stulti facti sunt principes Taneos emarcuerunt principes Mempheos deceperunt Aegyptum angulum populorum eius

<sup>14</sup> Dominus miscuit in medio eius spiritum vertiginis et errare fecerunt Aegyptum in omni opere suo sicut errat ebrius et vomens

<sup>15</sup> et non erit Aegyptus opus quod faciat caput et caudam incurvantem et refrenantem

<sup>16</sup> in die illa erit Aegyptus quasi mulieres et stupebunt et timebunt a facie commotionis manus Domini exercituum quam ipse movebit super eam

<sup>17</sup> et erit terra Iuda Aegyptus in festivitatem omnis qui illius fuerit recordatus pavebit a facie consilii Domini exercituum quod ipse cogitavit super eam

<sup>18</sup> in die illa erunt quinque civitates in terra Aegypti loquentes lingua Chanaan et iurantes per Dominum exercituum civitas Solis vocabitur una

<sup>19</sup> in die illa erit altare Domini in medio terrae Aegypti et titulus iuxta terminum eius Domini

<sup>20</sup> et erit in signum et in testimonium Domino exercituum in terra Aegypti clamabunt enim



ad Dominum a facie tribulantis et mittet eis salvatorem et propugnatorem qui liberet eos  
<sup>21</sup> et cognoscetur Dominus ab Aegypto et cognoscent Aegyptii Dominum in die illa et colent eum in hostiis et muneribus et vota vovebunt Domino et solvent  
<sup>22</sup> et percutiet Dominus Aegyptum plaga et sanabit eam et revertentur ad Dominum et placabitur eis et sanabit eos  
<sup>23</sup> in die illa erit via de Aegypto in Assyrios et intrabit Assyrius Aegyptum et Aegyptius in Assyrios et servient Aegyptii Assur  
<sup>24</sup> in die illa erit Israhel tertius Aegyptio et Assyrio benedictio in medio terrae  
<sup>25</sup> cui benedixit Dominus exercituum dicens benedictus populus meus Aegypti et opus manuum mearum Assyrio hereditas autem mea Israhel

## CAPITULUM 20

**I**n anno quo ingressus est Tharthan in Azotum cum misisset eum Sargon rex Assyriorum et pugnasset contra Azotum et cepisset eam  
<sup>2</sup> in tempore illo locutus est Dominus in manu Isaiae filii Amos dicens vade et solve saccum de lumbis tuis et calciamenta tua tolle de pedibus tuis et fecit sic vadens nudus et disculciatus  
<sup>3</sup> et dixit Dominus sicut ambulavit servus meus Isaias nudus et disculciatus trium annorum signum et portentum erit super Aegyptum et super Aethiopiam  
<sup>4</sup> sic minabit rex Assyriorum captivitatem Aegypti et transmigrationem Aethiopiae iuvenum et senum nudam et disculciatam discopertis natibus ignominiam Aegypti  
<sup>5</sup> et timebunt et confundentur ab Aethiopia spe sua et ab Aegypto gloria sua  
<sup>6</sup> et dicet habitator insulae huius in die illa ecce haec erat spes nostra ad quos confugimus in auxilium ut liberaret nos a facie regis Assyriorum et quomodo effugere poterimus nos

## CAPITULUM 21

**O**nus deserti maris sicut turbines ab africo veniunt de deserto venit de terra horribili  
<sup>2</sup> visio dura nuntiata est mihi qui incredulus est infideliter agit et qui depopulator est vastat ascende Aelam obside Mede omnem gemitum eius cessare feci  
<sup>3</sup> propterea repleti sunt lumbi mei dolore angustia possedit me sicut angustia parientis corruí cum audirem conturbatus sum cum viderem  
<sup>4</sup> emarcuit cor meum tenebrae stupefecerunt me Babylon dilecta mea posita est mihi in miraculum  
<sup>5</sup> pone mensam contemplare in specula comedentes bibentes surgite principes arripite clypeum  
<sup>6</sup> haec enim dixit mihi Dominus vade et pone speculatorem et quodcumque viderit adnuntiet  
<sup>7</sup> et vidit currum duorum equitum ascensorem asini et ascensorem cameli et contemplatus est diligenter multo intuitu  
<sup>8</sup> et clamavit leo super specula Domini ego sum stans iugiter per diem et super custodiam meam ego sum stans totis noctibus  
<sup>9</sup> ecce iste venit ascensor vir bigae equitum et respondit et dixit cecidit cecidit Babylon et omnia sculptilia deorum eius contrita sunt in terram  
<sup>10</sup> tritura mea et filii areae meae quae audivi a Domino exercituum Deo Israhel adnuntiavi

vobis

**11** onus Duma ad me clamat ex Seir custos quid de nocte custos quid de nocte

**12** dixit custos venit mane et nox si quaeritis quaerite convertimini venite

**13** onus in Arabia in saltu ad vesperam dormietis in semitis Dodanim

**14** occurrentes sitiendi ferte aquam qui habitatis terram austri cum panibus occurrere fugienti

**15** a facie enim gladiorum fugerunt a facie gladii imminentis a facie arcus extenti a facie gravis proelii

**16** quoniam haec dicit Dominus ad me adhuc in uno anno quasi in anno mercennarii et auferetur omnis gloria Cedar

**17** et reliquiae numeri sagittariorum fortium de filiis Cedar inminuentur Dominus enim Deus Israhel locutus est

## CAPITULUM 22

**O**nus vallis Visionis quidnam tibi quoque est quia ascendisti et tu omnis in tecta

**2** clamoris plena urbs frequens civitas exultans interfecti tui non interfecti gladio nec mortui in bello

**3** cuncti principes tui fugerunt simul dureque ligati sunt omnes qui inventi sunt vincti sunt pariter procul fugerunt

**4** propterea dixi recedite a me amare flebo nolite incumbere ut consolemini me super vastitate filiae populi mei

**5** dies enim interfectionis et conculcationis et fletuum Domino Deo exercituum in valle Visionis scrutans murum et magnificus super montem

**6** et Aelam sumpsit faretram currum hominis equitis et parietem nudavit clypeus

**7** et erunt electae valles tuae plenae quadrigarum et equites ponent sedes suas in porta

**8** et revelabitur operimentum Iudae et videbis in die illa armamentarium domus saltus

**9** et scissuras civitatis David videbitis quia multiplicatae sunt et congregastis aquas piscinae inferioris

**10** et domos Hierusalem numerastis et destruxistis domos ad muniendum murum

**11** et lacum fecistis inter duos muros et aquam piscinae veteris et non suspexistis ad eum qui fecerat eam et operatorem eius de longe non vidistis

**12** et vocavit Dominus Deus exercituum in die illa ad fletum et ad planctum ad calvitium et ad cingulum sacci

**13** et ecce gaudium et laetitia occidere vitulos et iugulare arietes comedere carnes et bibere vinum comedamus et bibamus cras enim moriemur

**14** et revelata est in auribus meis Domini exercituum si dimittetur iniquitas haec vobis donec moriamini dicit Dominus Deus exercituum

**15** haec dicit Dominus Deus exercituum vade ingredi ad eum qui habitat in tabernaculo ad Sobnam praepositum templi

**16** quid tu hic aut quasi quis hic quia excidisti tibi hic sepulchrum excidisti in excelso memoriam diligenter in petra tabernaculum tibi

**17** ecce Dominus asportari te faciet sicut asportatur gallus gallinacius et quasi amictum sic sublevabit te

**18** coronans coronabit te tribulatione quasi pilam mittet te in terram latam et spatiosam ibi

morieris et ibi erit currus gloriae tuae ignominia domus Domini tui

<sup>19</sup> et expellam te de statione tua et de ministerio tuo deponam te

<sup>20</sup> et erit in die illa vocabo servum meum Eliachim filium Helciae

<sup>21</sup> et induam illum tunicam tuam et cingulo tuo confortabo eum et potestatem tuam dabo in manu eius et erit quasi pater habitantibus Hierusalem et domui Iuda

<sup>22</sup> et dabo clavem domus David super umerum eius et aperiet et non erit qui claudat et claudet et non erit qui aperiat

<sup>23</sup> et figam illum paxillum in loco fideli et erit in solium gloriae domui patris sui

<sup>24</sup> et suspendent super eum omnem gloriam domus patris eius vasorum diversa genera omne vas parvulum a vasis craterarum usque ad omne vas musicorum

<sup>25</sup> in die illo dicit Dominus exercituum auferetur paxillus qui fixus fuerat in loco fideli et frangetur et cadet et peribit quod pependerit in eo quia Dominus locutus est

## CAPITULUM 23

**O**nus Tyri ululate naves maris quia vastata est domus unde venire consueverant de terra Cetthim revelatum est eis

<sup>2</sup> tacete qui habitatis in insula negotiatio Sidonis transfretantes mare repleverunt te

<sup>3</sup> in aquis multis semen Nili messis fluminis fruges eius et facta est negotiatio gentium

<sup>4</sup> erubescere Sidon ait enim mare fortitudo maris dicens non parturivi et non peperivi et non enutrivi iuvenes nec ad incrementum perduxivi virgines

<sup>5</sup> cum auditum fuerit in Aegypto dolebunt cum audierint de Tyro

<sup>6</sup> transite maria ululate qui habitatis in insula

<sup>7</sup> numquid non haec vestra est quae gloriabatur a diebus pristinis in antiquitate sua ducent eam pedes sui longe ad peregrinandum

<sup>8</sup> quis cogitavit hoc super Tyrum quondam coronatam cuius negotiatores principes institores eius incliti terrae

<sup>9</sup> Dominus exercituum cogitavit hoc ut detraheret superbiam omnis gloriae et ad ignominiam deduceret universos inclitos terrae

<sup>10</sup> transi terram tuam quasi flumen filia maris non est cingulum ultra tibi

<sup>11</sup> manum suam extendit super mare conturbavit regna Dominus mandavit adversum Chanaan ut contereret fortes eius

<sup>12</sup> et dixit non adicies ultra ut glorieris calumniam sustinens virgo filia Sidonis in Cetthim consurgens transfreta ibi quoque non erit requies tibi

<sup>13</sup> ecce terra Chaldeorum talis populus non fuit Assur fundavit eam in captivitatem transduxerunt robustos eius suffoderunt domos eius posuerunt eam in ruinam

<sup>14</sup> ululate naves maris quia devastata est fortitudo vestra

<sup>15</sup> et erit in die illa in oblivione eris o Tyre septuaginta annis sicut dies regis unius post septuaginta autem annos erit Tyro quasi canticum meretricis

<sup>16</sup> sume citharam circui civitatem meretrix oblivioni tradita bene cane frequenter canticum ut memoria tui sit

<sup>17</sup> et erit post septuaginta annos visitabit Dominus Tyrum et reducet eam ad mercedes suas et rursum fornicabitur cum universis regnis terrae super faciem terrae

<sup>18</sup> et erunt negotiatio eius et mercedes eius sanctificatae Domino non condentur neque reponentur quia his qui habitaverint coram Domino erit negotiatio eius ut manducent in saturitatem et vestiantur usque ad vetustatem

## CAPITULUM 24

**E**cce Dominus dissipabit terram et nudabit eam et adfliget faciem eius et disperget habitatores eius

<sup>2</sup> et erit sicut populus sic sacerdos et sicut servus sic dominus eius sicut ancilla sic domina eius sicut emens sic ille qui vendit sicut fenerator sic is qui mutuum accipit sicut qui repetit sic qui debet

<sup>3</sup> dissipatione dissipabitur terra et direptione praedabitur Dominus enim locutus est verbum hoc

<sup>4</sup> luxit et defluxit terra et infirmata est defluxit orbis infirmata est altitudo populi terrae

<sup>5</sup> et terra interfecta est ab habitatoribus suis quia transgressi sunt leges mutaverunt ius dissipaverunt foedus sempiternum

<sup>6</sup> propter hoc maledictio vorabit terram et peccabunt habitatores eius ideoque insanient cultores eius et relinquentur homines pauci

<sup>7</sup> luxit vindemia infirmata est vitis ingemuerunt omnes qui laetabantur corde

<sup>8</sup> cessavit gaudium tympanorum quievit sonitus laetantium conticuit dulcedo citharae

<sup>9</sup> cum cantico non bibent vinum amara erit potio bibentibus illam

<sup>10</sup> adtrita est civitas vanitatis clausa est omnis domus nullo introeunte

<sup>11</sup> clamor erit super vino in plateis deserta est omnis laetitia translatum est gaudium terrae

<sup>12</sup> relictas est in urbe solitudo et calamitas opprimet portas

<sup>13</sup> quia haec erunt in medio terrae in medio populorum quomodo si paucae olivae quae remanserunt excutiantur ex olea et racemi cum fuerit finita vindemia

<sup>14</sup> hii levabunt vocem suam atque laudabunt cum glorificatus fuerit Dominus hinnient de mari

<sup>15</sup> propter hoc in doctrinis glorificate Dominum in insulis maris nomen Domini Dei Israhel

<sup>16</sup> a finibus terrae laudes audivimus gloriam iusti et dixi secretum meum mihi secretum meum mihi vae mihi praevaricantes praevaricati sunt et praevaricatione transgressorum praevaricati sunt

<sup>17</sup> formido et fovea et laqueus super te qui habitator es terrae

<sup>18</sup> et erit qui fugerit a voce formidinis cadet in foveam et qui se explicuerit de fovea tenebitur laqueo quia cataractae de excelsis apertae sunt et concutientur fundamenta terrae

<sup>19</sup> confractione confringetur terra contritione conteretur terra commotione commovebitur terra

<sup>20</sup> agitatione agitabitur terra sicut ebrius et auferetur quasi tabernaculum unius noctis et gravabit eam iniquitas sua et corruet et non adiciet ut resurgat

<sup>21</sup> et erit in die illa visitabit Dominus super militiam caeli in excelso et super reges terrae qui sunt super terram

<sup>22</sup> et congregabuntur in congregationem unius fascis in lacum et cludentur ibi in carcerem

et post multos dies visitabuntur

<sup>23</sup> et erubescet luna et confundetur sol cum regnaverit Dominus exercituum in monte Sion et in Hierusalem et in conspectu senum suorum fuerit glorificatus

## CAPITULUM 25

**D**omine Deus meus es tu exaltabo te confitebor nomini tuo quoniam fecisti mirabilia cogitationes antiquas fideles amen

<sup>2</sup> quia posuisti civitatem in tumulum urbem fortem in ruinam domum alienorum ut non sit civitas et in sempiternum non aedificetur

<sup>3</sup> super hoc laudabit te populus fortis civitas gentium robustarum timebit te

<sup>4</sup> quia factus es fortitudo pauperi fortitudo egeno in tribulatione sua spes a turbine umbraculum ab aestu spiritus enim robustorum quasi turbo inpellens parietem

<sup>5</sup> sicut aestum in siti tumultum alienorum humiliabis et quasi calore sub nube torrente propaginem fortium marcescere facies

<sup>6</sup> et faciet Dominus exercituum omnibus populis in monte hoc convivium pinguium convivium vindemiae pinguium medullatorum vindemiae defecatae

<sup>7</sup> et praecipitabit in monte isto faciem vinculi conligati super omnes populos et telam quam orditus est super universas nationes

<sup>8</sup> praecipitabit mortem in sempiternum et auferet Dominus Deus lacrimam ab omni facie et obprobrium populi sui auferet de universa terra quia Dominus locutus est

<sup>9</sup> et dicet in die illa ecce Deus noster iste expectavimus eum et salvabit nos iste Dominus sustinuimus eum exultabimus et laetabimur in salutari eius

<sup>10</sup> quia requiescet manus Domini in monte isto et triturbabitur Moab sub eo sicuti teruntur paleae in plaustro

<sup>11</sup> et extendet manus suas sub eo sicut extendit natans ad natandum et humiliabit gloriam eius cum adlisione manuum eius

<sup>12</sup> et munimenta sublimium murorum tuorum concident et humiliabuntur et detrahentur in terram usque ad pulverem

## CAPITULUM 26

**I**n die illa cantabitur canticum istud in terra Iuda urbs fortitudinis nostrae salvator ponetur in ea murus et antemurale

<sup>2</sup> aperite portas et ingrediatur gens iusta custodiens veritatem

<sup>3</sup> vetus error abiit servabis pacem pacem quia in te speravimus

<sup>4</sup> sperastis in Domino in saeculis aeternis in Domino Deo forti in perpetuum

<sup>5</sup> quia incurvabit habitantes in excelso civitatem sublimem humiliabit humiliabit eam usque ad terram detrahet eam usque ad pulverem

<sup>6</sup> conculcabit eam pes pedes pauperis gressus egenorum

<sup>7</sup> semita iusti recta est rectus callis iusti ad ambulandum

<sup>8</sup> et in semita iudiciorum tuorum Domine sustinuimus te nomen tuum et memoriale tuum in desiderio animae

<sup>9</sup> anima mea desideravit te in nocte sed et spiritu meo in praecordiis meis de mane vigilabo ad te cum feceris iudicia tua in terra iustitiam discent habitatores orbis

- 10** misereamur impio et non discet iustitiam in terra sanctorum inique gessit et non videbit gloriam Domini
- 11** Domine exaltetur manus tua et non videant videant et confundantur zelantes populi et ignis hostes tuos devoret
- 12** Domine dabis pacem nobis omnia enim opera nostra operatus es nobis
- 13** Domine Deus noster possederunt nos domini absque te tantum in te recordemur nominis tui
- 14** morientes non vivant gigantes non resurgant propterea visitasti et contrivisti eos et perdidisti omnem memoriam eorum
- 15** indulsisti genti Domine indulsisti genti numquid glorificatus es elongasti omnes terminos terrae
- 16** Domine in angustia requisierunt te in tribulatione murmuris doctrina tua eis
- 17** sicut quae concipit cum adpropinquaverit ad partum dolens clamat in doloribus suis sic facti sumus a facie tua Domine
- 18** concepimus et quasi parturivimus et peperimus spiritum salutes non fecimus in terra ideo non ceciderunt habitatores terrae
- 19** vivent mortui tui interfecti mei resurgent expurgiscimini et laudate qui habitatis in pulvere quia ros lucis ros tuus et terram gigantum detrahes in ruinam
- 20** vade populus meus intra in cubicula tua claude ostia tua super te abscondere modicum ad momentum donec pertranseat indignatio
- 21** ecce enim Dominus egreditur de loco suo ut visitet iniquitatem habitatoris terrae contra eum et revelabit terra sanguinem suum et non operiet ultra interfectos suos

## CAPITULUM 27

- I**n die illo visitabit Dominus in gladio suo duro et grandi et forti super Leviathan serpentem vectem et super Leviathan serpentem tortuosum et occidet cetum qui in mari est
- 2** in die illa vinea meri cantabit ei
- 3** ego Dominus qui servo eam repente propinabo ei ne forte visitetur contra eam nocte et die servo eam
- 4** indignatio non est mihi quis dabit me spinam et veprem in proelio gradiar super eam succendam eam pariter
- 5** an potius tenebit fortitudinem meam faciet pacem mihi pacem faciet mihi
- 6** qui egrediuntur impetu ad Iacob florebit et germinabit Israel et implebunt faciem orbis semine
- 7** numquid iuxta plagam percutientis se percussit eum aut sicut occidit interfectos eius sic occisus est
- 8** in mensura contra mensuram cum abiecta fuerit iudicabis eam meditata est in spiritu suo duro per diem aestus
- 9** idcirco super hoc dimittetur iniquitas domui Iacob et iste omnis fructus ut auferatur peccatum eius cum posuerit omnes lapides altaris sicut lapides cineris adlisos non stabunt luci et delubra
- 10** civitas enim munita desolata erit speciosa relinquetur et dimittetur quasi desertum ibi pascetur vitulus et ibi accubabit et consumet summitates eius
- 11** in siccitate messis illius conterentur mulieres venientes et docentes eam non est enim populus sapiens propterea non miserebitur eius qui fecit eum et qui formavit eum non

parcet ei

**12** et erit in die illa percutiet Dominus ab alveo Fluminis usque ad torrentem Aegypti et vos congregabimini unus et unus filii Israhel

**13** et erit in die illa clangetur in tuba magna et venient qui perdit fuerant de terra Assyriorum et qui eiecti erant in terra Aegypti et adorabunt Dominum in monte sancto in Hierusalem

## CAPITULUM 28

**V**ae coronae superbiae ebriis Ephraim et flori decidenti gloriae exultationis eius qui erant in vertice vallis pinguissimae errantes a vino

**2** ecce validus et fortis Domini sicut impetus grandinis turbo confringens sicut impetus aquarum multarum inundantium et emissarum super terram spatiosam

**3** pedibus conculcabitur corona superbiae ebriorum Ephraim

**4** et erit flos decidens gloriae exultationis eius qui est super verticem vallis pinguium quasi temporaneum ante maturitatem autumnus quod cum aspexerit videns statim ut manu tenuerit devorabit illud

**5** in die illa erit Dominus exercituum corona gloriae et sertum exultationis residuo populi sui

**6** et spiritus iudicii sedenti super iudicium et fortitudo revertentibus de bello ad portam

**7** verum hii quoque prae vino nescierunt et prae ebrietate erraverunt sacerdos et propheta nescierunt prae ebrietate absorti sunt a vino erraverunt in ebrietate nescierunt videntem ignoraverunt iudicium

**8** omnes enim mensae repletae sunt vomitu sordiumque ita ut non esset ultra locus

**9** quem docebit scientiam et quem intellegere faciet auditum ablactatos a lacte apulsos ab uberibus

**10** quia manda remanda manda remanda expecta reexpecta expecta reexpecta modicum ibi modicum ibi

**11** in loquella enim labii et lingua altera loquetur ad populum istum

**12** cui dixit haec requies reficite lassum et hoc est meum refrigerium et noluerunt audire

**13** et erit eis verbum Domini manda remanda manda remanda expecta reexpecta expecta reexpecta modicum ibi modicum ibi ut vadant et cadant retrorsum et conterantur et inlaqueentur et capiantur

**14** propter hoc audite verbum Domini viri inlusores qui dominamini super populum meum qui est in Hierusalem

**15** dixistis enim percussimus foedus cum morte et cum inferno fecimus pactum flagellum inundans cum transierit non veniet super nos quia posuimus mendacium spem nostram et mendacio protecti sumus

**16** idcirco haec dicit Dominus Deus ecce ego mittam in fundamentis Sion lapidem lapidem probatum angularem pretiosum in fundamento fundatum qui crediderit non festinet

**17** et ponam iudicium in pondere et iustitiam in mensura et subvertet grando spem mendacii et protectionem aquae inundabunt

**18** et delebitur foedus vestrum cum morte et pactum vestrum cum inferno non stabit flagellum inundans cum transierit eritis ei in conculcationem

**19** quandocumque pertransierit tollet vos quoniam mane diluculo pertransibit in die et in nocte et tantummodo sola vexatio intellectum dabit auditui

<sup>20</sup> coangustatum est enim stratum ita ut alter decidat et pallium breve utrumque operire non potest

<sup>21</sup> sicut enim in monte Divisionum stabit Dominus sicut in valle quae est in Gabao irascetur ut faciat opus suum alienum opus eius ut operetur opus suum peregrinum est opus ab eo

<sup>22</sup> et nunc nolite inludere ne forte constringantur vincula vestra consummationem enim et ad abbreviationem audivi a Domino Deo exercituum super universam terram

<sup>23</sup> auribus percipite et audite vocem meam adtendite et audite eloquium meum

<sup>24</sup> numquid tota die arabit arans ut serat proscindet et sariet humum suam

<sup>25</sup> nonne cum adaequaverit faciem eius seret gith et cyminum sparget et ponet triticum per ordinem et hordeum et milium et viciam in finibus suis

<sup>26</sup> et erudiet eum illud in iudicio Deus suus docebit eum illud

<sup>27</sup> non enim in serris triturbabitur gith nec rota plaustrum super cyminum circumiet sed in virga excutietur gith et cyminum in baculo

<sup>28</sup> panis autem comminuetur verum non in perpetuum triturans triturabit illum neque vexabit eum rota plaustrum nec in ungulis suis comminuet eum

<sup>29</sup> et hoc a Domino Deo exercituum exivit ut mirabile faceret consilium et magnificaret iustitiam

## CAPITULUM 29

**V**ae Arihel Arihel civitas quam circumdedit David additus est annus ad annum sollemnitates evolutae sunt

<sup>2</sup> et circumvallabo Arihel et erit tristis et maerens et erit mihi quasi Arihel

<sup>3</sup> et circumdabo quasi spheram in circuitu tuo et iaciam contra te aggerem et munimenta ponam in obsidionem tuam

<sup>4</sup> humiliaberis de terra loqueris et de humo audietur eloquium tuum et erit quasi pythonis de terra vox tua et de humo eloquium tuum mussitabit

<sup>5</sup> et erit sicut pulvis tenuis multitudo ventilantium te et sicut favilla pertransiens multitudo eorum qui contra te praevaluerunt

<sup>6</sup> eritque repente confestim a Domino exercituum visitabitur in tonitru et commotione terrae et voce magna turbinis et tempestatis et flammae ignis devorantis

<sup>7</sup> et erit sicut somnium visionis nocturnae multitudo omnium gentium quae dimicaverunt contra Arihel et omnes qui militaverunt et obsederunt et praevaluerunt adversus eam

<sup>8</sup> et sicuti somniat esuriens et comedit cum autem fuerit expertus vacua est anima eius et sicut somniat sitiens et bibit et postquam fuerit expergefactus lassus adhuc sitit et anima eius vacua est sic erit multitudo omnium gentium quae dimicaverunt contra montem Sion

<sup>9</sup> obstupescite et admiramini fluctuate et vacillate inebriamini et non a vino movemini et non ebrietate

<sup>10</sup> quoniam miscuit vobis Dominus spiritum soporis claudet oculos vestros prophetas et principes vestros qui vident visiones operiet

<sup>11</sup> et erit vobis visio omnium sicut verba libri signati quem cum dederint scienti litteras dicent lege istum et respondebit non possum signatus est enim

<sup>12</sup> et dabitur liber nescienti litteras diceturque ei lege et respondebit nescio litteras

<sup>13</sup> et dixit Dominus eo quod adpropinquat populus iste ore suo et labiis suis glorificat me cor autem eius longe est a me et timuerunt me mandato hominum et doctrinis



- 14** ideo ecce ego addam ut admirationem faciam populo huic miraculo grandi et stupendo peribit enim sapientia a sapientibus eius et intellectus prudentium eius abscondetur
- 15** vae qui profundi estis corde ut a Domino abscondatis consilium quorum sunt in tenebris opera et dicunt quis videt nos et quis novit nos
- 16** perversa est haec vestra cogitatio quasi lutum contra figulum cogitet et dicat opus factori suo non fecisti me et figmentum dicat fictori suo non intellegis
- 17** nonne adhuc in modico et in brevi convertetur Libanus in Chermel et Chermel in saltum reputabitur
- 18** et audient in die illa surdi verba libri et de tenebris et caligine oculi caecorum videbunt
- 19** et addent mites in Domino laetitiam et pauperes homines in Sancto Israhel exultabunt
- 20** quoniam defecit qui praevalebat consummatus est inlusor et succisi sunt omnes qui vigilabant super iniquitatem
- 21** qui peccare faciebant homines in verbo et arguentem in porta subplantabant et declinaverunt frustra a iusto
- 22** propter hoc haec dicit Dominus ad domum Iacob qui redemit Abraham non modo confundetur Iacob nec modo vultus eius erubescet
- 23** sed cum viderit filios suos opera manuum mearum in medio sui sanctificantes nomen meum et sanctificabunt Sanctum Iacob et Deum Israhel praedicabunt
- 24** et scient errantes spiritu intellectum et mussitatores discent legem

## CAPITULUM 30

- V**ae filii desertores dicit Dominus ut faceretis consilium et non ex me et ordiremini telam et non per spiritum meum ut adderetur peccatum super peccatum
- 2** qui ambulatis ut descendatis in Aegyptum et os meum non interrogastis sperantes auxilium in fortitudine Pharaonis et habentes fiduciam in umbra Aegypti
- 3** et erit vobis fortitudo Pharaonis in confusionem et fiducia umbrae Aegypti in ignominiam
- 4** erant enim in Tanis principes tui et nuntii tui usque ad Anes pervenerunt
- 5** omnes confusi sunt super populo qui eis prodesse non potuit non fuerunt in auxilium et in aliquam utilitatem sed in confusionem et obprobrium
- 6** onus iumentorum austri in terra tribulationis et angustiae leaena et leo ex eis vipera et regulus volans portantes super umeros iumentorum divitias suas et super gibbum camelorum thesauros suos ad populum qui eis prodesse non poterit
- 7** Aegyptus enim frustra et vane auxiliabitur ideo clamavi super hoc superbia tantum est quiesce
- 8** nunc ingressus scribe eis super buxum et in libro diligenter exara illud et erit in die novissimo in testimonium usque ad aeternum
- 9** populus enim ad iracundiam provocans est et filii mendaces filii nolentes audire legem Domini
- 10** qui dicunt videntibus nolite videre et aspicientibus nolite aspicere nobis ea quae recta sunt loquimini nobis placentia videte nobis errores
- 11** auferte a me viam declinate a me semitam cesset a facie nostra Sanctus Israhel
- 12** propterea haec dicit Sanctus Israhel pro eo quod reprobastis verbum hoc et sperastis in calumniam et tumultum et innixi estis super eo
- 13** propterea erit vobis iniquitas haec sicut interruptio cadens et requisita in muro excelso quoniam subito dum non speratur veniet contritio eius

**14** et comminuetur sicut conteritur lagoena figuli contritione pervalida et non invenietur de fragmentis eius testa in qua portetur igniculus de incendio aut hauriatur parum aquae de fovea

**15** quia haec dicit Dominus Deus Sanctus Israhel si revertamini et quiescatis salvi eritis in silentio et in spe erit fortitudo vestra et noluistis

**16** et dixistis nequaquam sed ad equos fugiemus ideo fugietis et super veloces ascendemus ideo veloces erunt qui persequentur vos

**17** mille homines a facie terroris unius et a facie terroris quinque fugietis donec relinquamini quasi malus navis in vertice montis et quasi signum super collem

**18** propterea expectat Dominus ut misereatur vestri et ideo exaltabitur parcens vobis quia Deus iudicii Dominus beati omnes qui expectant eum

**19** populus enim Sion habitabit in Hierusalem plorans nequaquam plorabis miserans miserebitur tui ad vocem clamoris tui statim ut audierit respondebit tibi

**20** et dabit vobis Dominus panem artum et aquam brevem et non faciet avolare a te ultra doctorem tuum et erunt oculi tui videntes praeceptorem tuum

**21** et aures tuae audient verbum post tergum monentis haec via ambulate in ea neque ad dexteram neque ad sinistram

**22** et contaminabis lamminas sculptilium argenti tui et vestimentum conflatilis auri tui et disperges ea sicut immunditiam menstruatae egredere dices ei

**23** et dabitur pluvia semini tuo ubicumque seminaveris in terra et panis frugum terrae erit uberrimus et pinguis pascetur in possessione tua in die illo agnus spatiose

**24** et tauri tui et pulli asinorum qui operantur terram commixtum migma comedent sic in area ut ventilatum est

**25** et erunt super omnem montem excelsum et super omnem collem elevatum rivi currentium aquarum in die interfectionis multorum cum ceciderint turres

**26** et erit lux lunae sicut lux solis et lux solis erit septempliciter sicut lux septem dierum in die qua alligaverit Dominus vulnus populi sui et percussuram plagae eius sanaverit

**27** ecce nomen Domini venit de longinquo ardens furor eius et gravis ad portandum labia eius repleta sunt indignatione et lingua eius quasi ignis devorans

**28** spiritus eius velut torrens inundans usque ad medium colli ad perdendas gentes in nihilum et frenum erroris quod erat in maxillis populorum

**29** canticum erit vobis sicut nox sanctificatae sollemnitatis et laetitia cordis sicut qui pergit cum tibia ut intret in montem Domini ad Fortem Israhel

**30** et auditam faciet Dominus gloriam vocis suae et terrorem brachii sui ostendet in comminatione furoris et flamma ignis devorantis adlidet in turbine et in lapide grandinis

**31** a voce enim Domini pavebit Assur virga percussus

**32** et erit transitus virgae fundatus quam requiescere faciet Dominus super eum in tympanis et in citharis et in bellis praecipuis expugnabit eos

**33** praeparata est enim ab heri Thofeth a rege praeparata profunda et dilatata nutrimenta eius ignis et ligna multa flatus Domini sicut torrens sulphuris succendens eam

## CAPITULUM 31

**V**ae qui descendunt in Aegyptum ad auxilium in equis sperantes et habentes fiduciam super quadrigis quia multae sunt et super equitibus quia praevalidi nimis et non sunt confisi super Sanctum Israhel et Dominum non requisierunt

- <sup>2</sup> ipse autem sapiens adduxit malum et verba sua non abstulit et consurget contra domum pessimorum et contra auxilium operantium iniquitatem
- <sup>3</sup> Aegyptus homo et non deus et equi eorum caro et non spiritus et Dominus inclinabit manum suam et corruet auxiliator et cadet cui praestatur auxilium simulque omnes consumentur
- <sup>4</sup> quia haec dicit Dominus ad me quomodo si rugiat leo et catulus leonis super praedam suam cum occurrerit ei multitudo pastorum a voce eorum non formidabit et a multitudine eorum non pavebit sic descendet Dominus exercituum ut proelietur super montem Sion et super collem eius
- <sup>5</sup> sicut aves volantes sic proteget Dominus exercituum Hierusalem protegens et liberans transiens et salvans
- <sup>6</sup> convertimini sicut in profundum recesseratis filii Israhel
- <sup>7</sup> in die enim illa abiciet vir idola argenti sui et idola auri sui quae fecerunt vobis manus vestrae in peccatum
- <sup>8</sup> et cadet Assur in gladio non viri et gladius non hominis vorabit eum et fugiet non a facie gladii et iuvenes eius vectigales erunt
- <sup>9</sup> et fortitudo eius a terrore transibit et pavebunt fugientes principes eius dixit Dominus cuius ignis est in Sion et caminus eius in Hierusalem

## CAPITULUM 32

**E**cce in iustitia regnabit rex et principes in iudicio praeerunt

- <sup>2</sup> et erit vir sicut qui absconditur a vento et celat se a tempestate sicut rivi aquarum in siti et umbra petrae prominentis in terra deserta
- <sup>3</sup> non caligabunt oculi videntium et aures audientium diligenter auscultabunt
- <sup>4</sup> et cor stultorum intellet scientiam et lingua balborum velociter loquetur et plane
- <sup>5</sup> non vocabitur ultra is qui insipiens est princeps neque fraudulentus appellabitur maior
- <sup>6</sup> stultus enim fatua loquetur et cor eius faciet iniquitatem ut perficiat simulationem et loquatur ad Dominum fraudulenter et vacuefaciat animam esurientis et potum sitiendi auferat
- <sup>7</sup> fraudulentum vasa pessima sunt ipse enim cogitationes concinnavit ad perdendos mites in sermone mendacii cum loqueretur pauper iudicium
- <sup>8</sup> princeps vero ea quae digna sunt principe cogitavit et ipse super duces stabit
- <sup>9</sup> mulieres opulentae surgite et audite vocem meam filiae confidentes percipite auribus eloquium meum
- <sup>10</sup> post dies et annum et vos conturbabimini confidentes consummata est enim vindemia collectio ultra non veniet
- <sup>11</sup> obstupescite opulentae conturbamini confidentes exuite vos et confundimini accingite lumbos vestros
- <sup>12</sup> super ubera plangite super regione desiderabili super vinea fertili
- <sup>13</sup> super humum populi mei spina et vepres ascendent quanto magis super omnes domos gaudii civitatis exultantis
- <sup>14</sup> domus enim dimissa est multitudo urbis relictas est tenebrae et palpatio factae sunt super speluncas usque in aeternum gaudium onagrorum pascua gregum
- <sup>15</sup> donec effundatur super nos spiritus de excelso et erit desertum in Chermel et Chermel in saltum reputabitur

- <sup>16</sup> et habitabit in solitudine iudicium et iustitia in Chermel sedebit  
<sup>17</sup> et erit opus iustitiae pax et cultus iustitiae silentium et securitas usque in sempiternum  
<sup>18</sup> et sedebit populus meus in pulchritudine pacis et in tabernaculis fiducia et in requie opulenta  
<sup>19</sup> grando autem in descensione saltus et humilitate humiliabitur civitas  
<sup>20</sup> beati qui seminatis super omnes aquas inmittentes pedem bovis et asini

## CAPITULUM 33

**V**ae qui praedaris nonne et ipse praedaberis et qui spernis nonne et ipse sperneris cum consummaveris depraedationem depraedaberis cum fatigatus desiveris contemnere contemneris

<sup>2</sup> Domine miserere nostri te expectavimus esto brachium eorum in mane et salus nostra in tempore tribulationis

<sup>3</sup> a voce angeli fugerunt populi ab exaltatione tua dispersae sunt gentes

<sup>4</sup> et congregabuntur spolia vestra sicut colligitur brucus velut cum fossae plenae fuerint de eo

<sup>5</sup> magnificatus est Dominus quoniam habitavit in excelso implevit Sion iudicio et iustitia

<sup>6</sup> et erit fides in temporibus tuis divitiae salutis sapientia et scientia timor Domini ipse thesaurus eius

<sup>7</sup> ecce videntes clamabunt foris angeli pacis amare flebunt

<sup>8</sup> dissipatae sunt viae cessavit transiens per semitam irritum factum est pactum proiecit civitates non reputavit homines

<sup>9</sup> luxit et elanguit terra confusus est Libanus et obsorduit et factus est Saron sicut desertum et concussa est Basan et Carmelus

<sup>10</sup> nunc consurgam dicit Dominus nunc exaltabor nunc sublevabor

<sup>11</sup> concipietis ardorem parietis stipulam spiritus vester ut ignis vorabit vos

<sup>12</sup> et erunt populi quasi de incendio cinis spinae congregatae igni comburentur

<sup>13</sup> audite qui longe estis quae fecerim et cognoscite vicini fortitudinem meam

<sup>14</sup> conterriti sunt in Sion peccatores possedit tremor hypocritas quis poterit habitare de vobis cum igne devorante quis habitabit ex vobis cum ardoribus sempiternis

<sup>15</sup> qui ambulat in iustitiis et loquitur veritates qui proicit avaritiam ex calumnia et excutit manus suas ab omni munere qui obturat aures suas ne audiat sanguinem et claudit oculos suos ne videat malum

<sup>16</sup> iste in excelsis habitabit munimenta saxorum sublimitas eius panis ei datus est aquae eius fideles sunt

<sup>17</sup> regem in decore suo videbunt oculi eius cernent terram de longe

<sup>18</sup> cor tuum meditabitur timorem ubi est litteratus ubi legis verba ponderans ubi doctor parvulorum

<sup>19</sup> populum inpudentem non videbis populum alti sermonis ita ut non possis intellegere disertitudinem linguae eius in quo nulla est sapientia

<sup>20</sup> respice Sion civitatem sollemnitatis nostrae oculi tui videbunt Hierusalem habitationem opulentam tabernaculum quod nequaquam transferri poterit nec auferentur clavi eius in sempiternum et omnes funiculi eius non rumpentur

<sup>21</sup> quia solummodo ibi magnificus Dominus noster locus fluviorum rivi latissimi et patentes

non transibit per eum navis remigum neque trieris magna transgredietur eum

<sup>22</sup> Dominus enim iudex noster Dominus legifer noster Dominus rex noster ipse salvabit nos

<sup>23</sup> laxati sunt funiculi tui sed non praevallebunt sic erit malus tuus ut dilatare signum non queas tunc dividuntur spolia praedarum multarum claudi diripient rapinam

<sup>24</sup> nec dicet vicinus elangui populus qui habitat in ea auferetur ab eo iniquitas

## CAPITULUM 34

**a**ccedite gentes et audite et populi adtendite audiat terra et plenitudo eius orbis et omne germen eius

<sup>2</sup> quia indignatio Domini super omnes gentes et furor super universam militiam eorum interfecit eos et dedit eos in occisionem

<sup>3</sup> interfecti eorum proicientur et de cadaveribus eorum ascendet fetor tabescent montes sanguine eorum

<sup>4</sup> et tabescet omnis militia caelorum et conplicabuntur sicut liber caeli et omnis militia eorum defluet sicut defluit folium de vinea et de ficu

<sup>5</sup> quoniam inebriatus est in caelo gladius meus ecce super Idumeam descendet et super populum interfectionis meae ad iudicium

<sup>6</sup> gladius Domini repletus est sanguine incrassatus est adipe de sanguine agnorum et hircorum de sanguine medullatorum arietum victima enim Domini in Bosra et interfectio magna in terra Edom

<sup>7</sup> et descendent unicornes cum eis et tauri cum potentibus inebriabitur terra eorum sanguine et humus eorum adipe pinguium

<sup>8</sup> quia dies ultionis Domini annus retributionum iudicii Sion

<sup>9</sup> et convertentur torrentes eius in picem et humus eius in sulphur et erit terra eius in picem ardentem

<sup>10</sup> nocte et die non extinguetur in sempiternum ascendet fumus eius a generatione in generationem desolabitur in saeculum saeculorum non erit transiens per eam

<sup>11</sup> et possidebunt illam onocrotalus et ericius et ibis et corvus habitabunt in ea et extendetur super eam mensura ut redigatur ad nihilum et perpendiculum in desolationem

<sup>12</sup> nobiles eius non erunt ibi regem potius invocabunt et omnes principes eius erunt in nihilum

<sup>13</sup> et orientur in domibus eius spinae et urticae et paliurus in munitionibus eius et erit cubile draconum et pascua strutionum

<sup>14</sup> et occurrent daemonia onocentauris et pilosus clamabit alter ad alterum ibi cubavit lamia et invenit sibi requiem

<sup>15</sup> ibi habuit foveam ericius et enutrivit catulos et circumfodit et fovit in umbra eius illuc congregati sunt milvi alter ad alterum

<sup>16</sup> requirite diligenter in libro Domini et legite unum ex eis non defuit alter ad alterum non quaesivit quia quod ex ore meo procedit ille mandavit et spiritus eius ipse congregavit ea

<sup>17</sup> et ipse misit eis sortem et manus eius divisit eam illis in mensuram usque in aeternum possidebunt eam in generatione et generatione habitabunt in ea

## CAPITULUM 35

**1** laetabitur deserta et invia et exultabit solitudo et florebit quasi lilium  
**2** germinans germinabit et exultabit laetabunda et laudans gloria Libani data est ei decor Carmeli et Saron ipsi videbunt gloriam Domini et decorem Dei nostri  
**3** confortate manus dissolutas et genua debilia roborate  
**4** dicite pusillanimis confortamini nolite timere ecce Deus vester ultionem adducet retributionis Deus ipse veniet et salvabit vos  
**5** tunc aperientur oculi caecorum et aures surdorum patebunt  
**6** tunc saliet sicut cervus claudus et aperta erit lingua mutorum quia scissae sunt in deserto aquae et torrentes in solitudine  
**7** et quae erat arida in stagnum et sitiens in fontes aquarum in cubilibus in quibus prius dracones habitabant orietur viror calami et iunci  
**8** et erit ibi semita et via et via sancta vocabitur non transibit per eam pollutus et haec erit nobis directa via ita ut stulti non errent per eam  
**9** non erit ibi leo et mala bestia non ascendet per eam nec invenietur ibi et ambulabunt qui liberati fuerint  
**10** et redempti a Domino convertentur et venient in Sion cum laude et laetitia sempiterna super caput eorum gaudium et laetitiam obtinebunt et fugiet dolor et gemitus

## CAPITULUM 36

**E**t factum est in quartodecimo anno regis Ezechiae ascendit Sennacherib rex Assyriorum super omnes civitates Iuda munitas et cepit eas  
**2** et misit rex Assyriorum Rabsacen de Lachis in Hierusalem ad regem Ezechiam in manu gravi et stetit in aquaeductu piscinae superioris in via agri Fullonis  
**3** et egressus est ad eum Eliachim filius Helciae qui erat super domum et Sobna scriba et Ioae filius Asaph a commentariis  
**4** et dixit ad eos Rabsaces dicite Ezechiae haec dicit rex magnus rex Assyriorum quae est ista fiducia qua confidis  
**5** aut quo consilio vel fortitudine rebellare disponis super quem habes fiduciam quia recessisti a me  
**6** ecce confidis super baculum harundineum confractum istum super Aegyptum cui si innisus fuerit homo intrabit in manu eius et perforabit eam sic Pharaon rex Aegypti omnibus qui confidunt in eo  
**7** quod si responderis mihi in Domino Deo nostro confidimus nonne ipse est cuius abstulit Ezechias excelsa et altaria et dixit Iudae et Hierusalem coram altari isto adorabitis  
**8** et nunc trade te domino meo regi Assyriorum et dabo tibi duo milia equorum nec poteris ex te praebere ascensores eorum  
**9** et quomodo sustinebis faciem iudicis unius loci ex servis domini mei minoribus quod si confidis in Aegypto in quadriga et in equitibus  
**10** et nunc numquid sine Domino ascendi ad terram istam ut disperderem eam Dominus dixit ad me ascende super terram istam etisperde eam  
**11** et dixit Eliachim et Sobna et Ioae ad Rabsacen loquere ad servos tuos syra lingua intellegimus enim ne loquaris ad nos iudaice in auribus populi qui est super murum  
**12** et dixit ad eos Rabsaces numquid ad dominum tuum et ad te misit me dominus meus ut loquerer omnia verba ista et non potius ad viros qui sedent in muro ut comedant stercora sua et bibant urinam pedum suorum vobiscum

**13** et stetit Rabsaces et clamavit voce magna iudaice et dixit audite verba regis magni regis Assyriorum

**14** haec dicit rex non seducat vos Ezechias quia non poterit eruere vos

**15** et non vobis tribuat fiduciam Ezechias super Domino dicens eruens liberabit nos Dominus non dabitur civitas ista in manu regis Assyriorum

**16** nolite audire Ezechiam haec enim dicit rex Assyriorum facite mecum benedictionem et egredimini ad me et comedite unusquisque vineam suam et unusquisque ficum suam et bibite unusquisque aquam cisternae suae

**17** donec veniam et tollam vos ad terram quae est ut terra vestra terram frumenti et vini terram panum et vinearum

**18** ne conturbet vos Ezechias dicens Dominus liberabit nos numquid liberaverunt dii gentium unusquisque terram suam de manu regis Assyriorum

**19** ubi est deus Emath et Arfad ubi est deus Seffarvaim numquid liberaverunt Samariam de manu mea

**20** quis est ex omnibus diis terrarum istarum qui eruerit terram suam de manu mea ut eruat Dominus Hierusalem de manu mea

**21** et siluerunt et non responderunt ei verbum mandaverat enim rex dicens ne respondeatis ei

**22** et ingressus est Eliachim filius Helciae qui erat super domum et Sobna scriba et loae filius Asaph a commentariis ad Ezechiam scissis vestibus et nuntiaverunt ei verba Rabsacis

## CAPITULUM 37

**E**t factum est cum audisset rex Ezechias scidit vestimenta sua et obvolutus est sacco et intravit in domum Domini

**2** et misit Eliachim qui erat super domum et Sobnam scribam et seniores de sacerdotibus opertos saccis ad Isaïam filium Amos prophetam

**3** et dixerunt ad eum haec dicit Ezechias dies tribulationis et correptionis et blasphemiae dies haec quia venerunt filii usque ad partum et virtus non est parienti

**4** si quo modo audiat Dominus Deus tuus verba Rabsaces quem misit rex Assyriorum dominus suus ad blasphemandum Deum viventem et obprobandum sermonibus quos audivit Dominus Deus tuus leva ergo orationem pro reliquiis quae reppertae sunt

**5** et venerunt servi regis Ezechiae ad Isaïam

**6** et dixit ad eos Isaïas haec dicetis domino vestro haec dicit Dominus ne timeas a facie verborum quae audisti quibus blasphemaverunt pueri regis Assyriorum me

**7** ecce ego dabo ei spiritum et audiet nuntium et revertetur ad terram suam et corruiere eum faciam gladio in terra sua

**8** reversus est autem Rabsaces et invenit regem Assyriorum proeliantem adversus Lobna audierat enim quia profectus esset de Lachis

**9** et audivit de Tharaca rege Aethiopiae dicentes egressus est ut pugnet contra te quod cum audisset misit nuntios ad Ezechiam dicens

**10** haec dicetis Ezechiae regi Iudae loquentes non te decipiat Deus tuus in quo tu confidis dicens non dabitur Hierusalem in manu regis Assyriorum

**11** ecce tu audisti omnia quae fecerunt reges Assyriorum omnibus terris quas subverterunt et tu poteris liberari



**12** numquid eruerunt eos dii gentium quos subverterunt patres mei Gozan et Aran et Reseph et filios Eden qui erant in Thalassar

**13** ubi est rex Emath et rex Arfad et rex urbis Seffarvaim Anahe et Ava

**14** et tulit Ezechias libros de manu nuntiorum et legit eos et ascendit in domum Domini et expandit eos Ezechias coram Domino

**15** et oravit Ezechias ad Dominum dicens

**16** Domine exercituum Deus Israhel qui sedes super cherubin tu es Deus solus omnium regnorum terrae tu fecisti caelum et terram

**17** inclina Domine aurem tuam et audi aperi Domine oculos tuos et vide et audi omnia verba Sennacherib quae misit ad blasphemandum Deum viventem

**18** vere enim Domine desertas fecerunt reges Assyriorum terras et regiones earum

**19** et dederunt deos earum igni non enim erant dii sed opera manuum hominum lignum et lapis et comminuerunt eos

**20** et nunc Domine Deus noster salva nos de manu eius et cognoscant omnia regna terrae quia tu es Dominus solus

**21** et misit Isaias filius Amos ad Ezechiam dicens haec dicit Dominus Deus Israhel pro quibus rogasti me de Sennacherib rege Assyriorum

**22** hoc est verbum quod locutus est Dominus super eum despexit te subsannavit te virgo filia Sion post te caput movit filia Hierusalem

**23** cui exprobrasti et quem blasphemasti et super quem exaltasti vocem et levasti altitudinem oculorum tuorum ad Sanctum Israhel

**24** in manu servorum tuorum exprobrasti Domino et dixisti in multitudine quadrigarum mearum ego ascendi altitudinem montium iuga Libani et succidam excelsa cedrorum eius electas abietes illius et introibo altitudinem summitatis eius saltum Carmeli eius

**25** ego fodi et bibi aquam et exsiccavi vestigio pedis mei omnes rivos aggerum

**26** numquid non audisti quae olim fecerim ei ex diebus antiquis ego plasmavi illud et nunc adduxi et factum est in eradicationem collium conpugnantium et civitatum munitarum

**27** habitatores earum breviata manu contremuerunt et confusi sunt facti sunt sicut faenum agri et gramen pascuae et herba tectorum quae exaruit antequam maturesceret

**28** habitationem tuam et egressum tuum et introitum tuum cognovi et insaniam tuam contra me

**29** cum fureres adversum me superbia tua ascendit in aures meas ponam ergo circulum in naribus tuis et frenum in labiis tuis et reducam te in viam per quam venisti

**30** tibi autem hoc erit signum comede hoc anno quae sponte nascuntur et in anno secundo pomis vescere in anno autem tertio seminate et metite et plantate vineas et comedite fructum earum

**31** et mittet id quod salvatum fuerit de domo Iuda et quod reliquum est radicem deorsum et faciet fructum sursum

**32** quia de Hierusalem exhibunt reliquiae et salvatio de monte Sion zelus Domini exercituum faciet istud

**33** propterea haec dicit Dominus de rege Assyriorum non introibit civitatem hanc et non iaciet ibi sagittam et non occupabit eam clypeus et non mittet in circuitu eius aggerem

**34** in via qua venit per eam revertetur et civitatem hanc non ingredietur dicit Dominus

**35** et protegam civitatem istam ut salvem eam propter me et propter David servum meum

**36** egressus est autem angelus Domini et percussit in castris Assyriorum centum octoginta quinque milia et surrexerunt mane et ecce omnes cadavera mortuorum



<sup>37</sup> et egressus est et abiit et reversus est Sennacherib rex Assyriorum et habitavit in Nineve

<sup>38</sup> et factum est cum adoraret in templo Nesrach deum suum Adramelech et Sarasar filii eius percusserunt eum gladio fugeruntque in terram Ararat et regnavit Asoraddon filius eius pro eo

## CAPITULUM 38

**I**n diebus illis aegrotavit Ezechias usque ad mortem et introivit ad eum Isaias filius Amos propheta et dixit ei haec dicit Dominus dispone domui tuae quia morieris tu et non vives

<sup>2</sup> et convertit Ezechias faciem suam ad parietem et oravit ad Dominum

<sup>3</sup> et dixit obsecro Domine memento quaeso quomodo ambulaverim coram te in veritate et in corde perfecto et quod bonum est in oculis tuis fecerim et flevit Ezechias fletu magno

<sup>4</sup> et factum est verbum Domini ad Isaiam dicens

<sup>5</sup> vade et dic Ezechiae haec dicit Dominus Deus David patris tui audiui orationem tuam vidi lacrimam tuam ecce ego adiciam super dies tuos quindecim annos

<sup>6</sup> et de manu regis Assyriorum eruam te et civitatem istam et protegam eam

<sup>7</sup> hoc autem tibi erit signum a Domino quia faciet Dominus verbum hoc quod locutus est

<sup>8</sup> ecce ego reverti faciam umbram linearum per quas descenderat in horologio Ahaz in sole retrorsum decem lineis et reversus est sol decem lineis per gradus quos descenderat

<sup>9</sup> scriptura Ezechiae regis Iuda cum aegrotasset et convalesceret de infirmitate sua

<sup>10</sup> ego dixi in dimidio dierum meorum vadam ad portas inferi quaesivi residuum annorum meorum

<sup>11</sup> dixi non videbo Dominum Dominum in terra viventium non aspiciam hominem ultra et habitatorem quievit

<sup>12</sup> generatio mea ablata est et convoluta est a me quasi tabernaculum pastorum praecisa est velut a texente vita mea dum adhuc ordire succidit me de mane usque ad vesperam finies me

<sup>13</sup> sperabam usque ad mane quasi leo sic contrivit omnia ossa mea de mane usque ad vesperam finies me

<sup>14</sup> sicut pullus hirundinis sic clamabo meditabor ut columba adtenuati sunt oculi mei suspicientes in excelsum Domine vim patior sponde pro me

<sup>15</sup> quid dicam aut quid respondebit mihi cum ipse fecerit recogitabo omnes annos meos in amaritudine animae meae

<sup>16</sup> Domine sic vivitur et in talibus vita spiritus mei corripies me et vivificabis me

<sup>17</sup> ecce in pace amaritudo mea amarissima tu autem eruisti animam meam ut non periret proiecisti post tergum tuum omnia peccata mea

<sup>18</sup> quia non infernus confitebitur tibi neque mors laudabit te non expectabunt qui descendunt in lacum veritatem tuam

<sup>19</sup> vivens vivens ipse confitebitur tibi sicut et ego hodie pater filiis notam faciet veritatem tuam

<sup>20</sup> Domine salvum me fac et psalmos nostros cantabimus cunctis diebus vitae nostrae in domo Domini

<sup>21</sup> et iussit Isaias ut tollerent massam de ficis et cataplasma rent super vulnus et sanaretur

<sup>22</sup> et dixit Ezechias quod erit signum quia ascendam in domo Domini

## CAPITULUM 39

**I**n tempore illo misit Marodach Baladan filius Baladan rex Babylonis libros et munera ad Ezechiam audierat enim quod aegrotasset et convaluisset

<sup>2</sup> laetatus est autem super eis Ezechias et ostendit eis cellam aromatum et argenti et auri et odoramentorum et unguenti optimi et omnes apothecas supellectilis suae et universa quae inventa sunt in thesauris eius non fuit verbum quod non ostenderet eis Ezechias in domo sua et in omni potestate sua

<sup>3</sup> introiit autem Isaias propheta ad regem Ezechiam et dixit ei quid dixerunt viri isti et unde venerunt ad te et dixit Ezechias de terra longinqua venerunt ad me de Babylone

<sup>4</sup> et dixit quid viderunt in domo tua et dixit Ezechias omnia quae in domo mea sunt viderunt non fuit res quam non ostenderim eis in thesauris meis

<sup>5</sup> et dixit Isaias ad Ezechiam audi verbum Domini exercituum

<sup>6</sup> ecce dies venient et auferentur omnia quae in domo tua sunt et quae thesaurizaverunt patres tui usque ad diem hanc in Babylonem non relinquetur quicquam dicit Dominus

<sup>7</sup> et de filiis tuis qui exhibunt de te quos genueris tollent et erunt eunuchi in palatio regis Babylonis

<sup>8</sup> et dixit Ezechias ad Isaiam bonum verbum Domini quod locutus est et dixit fiat tantum pax et veritas in diebus meis

## CAPITULUM 40

**C**onsolamini consolamini populus meus dicit Deus vester

<sup>2</sup> loquimini ad cor Hierusalem et avocate eam quoniam completa est malitia eius dimissa est iniquitas illius suscepit de manu Domini duplicia pro omnibus peccatis suis

<sup>3</sup> vox clamantis in deserto parate viam Domini rectas facite in solitudine semitas Dei nostri

<sup>4</sup> omnis vallis exaltabitur et omnis mons et collis humiliabitur et erunt prava in directa et aspera in vias planas

<sup>5</sup> et revelabitur gloria Domini et videbit omnis caro pariter quod os Domini locutum est

<sup>6</sup> vox dicentis clama et dixi quid clamabo omnis caro faenum et omnis gloria eius quasi flos agri

<sup>7</sup> exsiccatum est faenum et cecidit flos quia spiritus Domini sufflavit in eo vere faenum est populus

<sup>8</sup> exsiccatum est faenum cecidit flos verbum autem Dei nostri stabit in aeternum

<sup>9</sup> super montem excelsum ascende tu quae evangelizas Sion exalta in fortitudine vocem tuam quae evangelizas Hierusalem exalta noli timere dic civitatibus Iudae ecce Deus vester

<sup>10</sup> ecce Dominus Deus in fortitudine veniet et brachium eius dominabitur ecce merces eius cum eo et opus illius coram eo

<sup>11</sup> sicut pastor gregem suum pascet in brachio suo congregabit agnos et in sinu suo levabit fetas ipse portabit

<sup>12</sup> quis mensus est pugillo aquas et caelos palmo ponderavit quis adpendit tribus digitis molem terrae et libravit in pondere montes et colles in statera

<sup>13</sup> quis adiuvit spiritum Domini aut quis consiliarius eius fuit et ostendit illi

<sup>14</sup> cum quo iniit consilium et instruxit eum et docuit eum semitam iustitiae et erudit eum scientiam et viam prudentiae ostendit illi

- <sup>15</sup> ecce gentes quasi stilla situlae et quasi momentum staterae reputatae sunt ecce insulae quasi pulvis exiguus
- <sup>16</sup> et Libanus non sufficiet ad succendendum et animalia eius non sufficient ad holocaustum
- <sup>17</sup> omnes gentes quasi non sint sic sunt coram eo et quasi nihilum et inane reputatae sunt ei
- <sup>18</sup> cui ergo similem fecistis Deum aut quam imaginem ponetis ei
- <sup>19</sup> numquid sculpsit confluxit faber aut aurifex auro figuravit illud et lamminis argenteis argentarius
- <sup>20</sup> forte lignum et inputribile elegit artifex sapiens quaerit quomodo statuatur simulacrum quod non moveatur
- <sup>21</sup> numquid non scietis numquid non audietis numquid non adnuntiatur est ab initio vobis numquid non intellexistis fundamenta terrae
- <sup>22</sup> qui sedet super gyrum terrae et habitatores eius sunt quasi lucustae qui extendit velut nihilum caelos et expandit eos sicut tabernaculum ad inhabitandum
- <sup>23</sup> qui dat secretorum scrutatores quasi non sint iudices terrae velut inane fecit
- <sup>24</sup> et quidem neque plantatos neque satos neque radicato in terra trunco eorum repente fluxit in eos et aruerunt et turbo quasi stipulam auferet eos
- <sup>25</sup> et cui adsimilastis me et adaequastis dicit Sanctus
- <sup>26</sup> levate in excelsum oculos vestros et videte quis creavit haec qui educit in numero militiam eorum et omnes ex nomine vocat prae multitudine fortitudinis et roboris virtutisque eius neque unum reliquum fuit
- <sup>27</sup> quare dicis Iacob et loqueris Israel abscondita est via mea a Domino et a Deo meo iudicium meum transibit
- <sup>28</sup> numquid nescis aut non audisti Deus sempiternus Dominus qui creavit terminos terrae non deficiet neque laborabit nec est investigatio sapientiae eius
- <sup>29</sup> qui dat lasso virtutem et his qui non sunt fortitudinem et robur multiplicat
- <sup>30</sup> deficient pueri et laborabunt et iuvenes in infirmitate cadent
- <sup>31</sup> qui autem sperant in Domino mutabunt fortitudinem adsumunt pinnas sicut aquilae current et non laborabunt ambulabunt et non deficient

## CAPITULUM 41

**t**aceant ad me insulae et gentes mutent fortitudinem accedant et tunc loquantur simul ad iudicium propinquemus

- <sup>2</sup> quis suscitavit ab oriente iustum vocavit eum ut sequeretur se dabit in conspectu eius gentes et reges obtinebit dabit quasi pulverem gladio eius sicut stipulam vento raptam arcui eius
- <sup>3</sup> persequetur eos transibit in pace semita in pedibus eius non apparebit
- <sup>4</sup> quis haec operatus est et fecit vocans generationes ab exordio ego Dominus primus et novissimus ego sum
- <sup>5</sup> viderunt insulae et timuerunt extrema terrae obstipuerunt adpropinquaverunt et accesserunt
- <sup>6</sup> unusquisque proximo suo auxiliatur et fratri suo dicit confortare
- <sup>7</sup> confortabit faber aerarius percutiens malleo eum qui cudebat tunc temporis dicens glutino bonum est et confortavit eum in clavis ut non moveatur

- <sup>8</sup> et tu Israhel serve meus Iacob quem elegi semen Abraham amici mei
- <sup>9</sup> in quo adprehendi te ab extremis terrae et a longinquis eius vocavi te et dixi tibi servus meus es tu elegi te et non abieci te
- <sup>10</sup> ne timeas quia tecum sum ego ne declines quia ego Deus tuus confortavi te et auxiliatus sum tui et suscepi te dextera iusti mei
- <sup>11</sup> ecce confundentur et erubescunt omnes qui pugnant adversum te erunt quasi non sint et peribunt viri qui contradicunt tibi
- <sup>12</sup> quaeres eos et non invenies viros rebelles tuos erunt quasi non sint et veluti consumptio homines bellantes adversum te
- <sup>13</sup> quia ego Dominus Deus tuus adprehendens manum tuam dicensque tibi ne timeas ego adiuvi te
- <sup>14</sup> noli timere vermis Iacob qui mortui estis ex Israhel ego auxiliatus sum tui dicit Dominus et redemptor tuus Sanctus Israhel
- <sup>15</sup> ego posui te quasi plaustrum triturans novum habens rostra serrantia triturabis montes et comminues et colles quasi pulverem pones
- <sup>16</sup> ventilabis eos et ventus tollet et turbo disperget eos et tu exultabis in Domino in Sancto Israhel laetaberis
- <sup>17</sup> egeni et pauperes quaerunt aquas et non sunt lingua eorum siti aruit ego Dominus exaudiam eos Deus Israhel non derelinquam eos
- <sup>18</sup> aperiam in supinis collibus flumina et in medio camporum fontes ponam desertum in stagna aquarum et terram inviam in rivos aquarum
- <sup>19</sup> dabo in solitudine cedrum et spinam et myrtum et lignum olivae ponam in deserto abietem ulmum et buxum simul
- <sup>20</sup> ut videant et sciant et recogitent et intellegant pariter quia manus Domini fecit hoc et Sanctus Israhel creavit illud
- <sup>21</sup> prope facite iudicium vestrum dicit Dominus adferte si quid forte habetis dixit Rex Iacob
- <sup>22</sup> accedant et nuntient nobis quaecumque ventura sunt priora quae fuerint nuntiate et ponemus cor nostrum et sciemus novissima eorum et quae ventura sunt indicate nobis
- <sup>23</sup> adnuntiate quae ventura sunt in futurum et sciemus quia dii estis vos bene quoque aut male si potestis facite et loquamur et videamus simul
- <sup>24</sup> ecce vos estis ex nihilo et opus vestrum ex eo quod non est abominatio est qui elegit vos
- <sup>25</sup> suscitavi ab aquilone et venit ab ortu solis vocabit nomen meum et adducet magistratus quasi lutum et velut plastes conculcans humum
- <sup>26</sup> quis adnuntiavit ab exordio ut sciamus et a principio ut dicamus iustus es non est neque adnuntians neque praedicens neque audiens sermones vestros
- <sup>27</sup> primus ad Sion dicet ecce adsunt et Hierusalem evangelistam dabo
- <sup>28</sup> et vidi et non erat neque ex istis quisquam qui iniret consilium et interrogatus responderet verbum
- <sup>29</sup> ecce omnes iniusti et vana opera eorum ventus et inane simulacra eorum

## CAPITULUM 42

**E**cce servus meus suscipiam eum electus meus conplacuit sibi in illo anima mea dedi spiritum meum super eum iudicium gentibus proferet

<sup>2</sup> non clamabit neque accipiet personam nec audietur foris vox eius

- <sup>3</sup> calamum quassatum non conteret et linum fumigans non extinguet in veritate educet iudicium
- <sup>4</sup> non erit tristis neque turbulentus donec ponat in terra iudicium et legem eius insulae expectabunt
- <sup>5</sup> haec dicit Dominus Deus creans caelos et extendens eos firmans terram et quae germinant ex ea dans flatum populo qui est super eam et spiritum calcantibus eam
- <sup>6</sup> ego Dominus vocavi te in iustitia et adprehendi manum tuam et servavi et dedi te in foedus populi in lucem gentium
- <sup>7</sup> ut aperires oculos caecorum et educeres de conclusione vinctum de domo carceris sedentes in tenebris
- <sup>8</sup> ego Dominus hoc est nomen meum gloriam meam alteri non dabo et laudem meam sculptilibus
- <sup>9</sup> quae prima fuerant ecce venerunt nova quoque ego adnuntio antequam oriantur audita vobis faciam
- <sup>10</sup> cantate Domino canticum novum laus eius ab extremis terrae qui descenditis in mare et plenitudo eius insulae et habitatores earum
- <sup>11</sup> sublevetur desertum et civitates eius in domibus habitabit Cedar laudate habitatores Petrae de vertice montium clamabunt
- <sup>12</sup> ponent Domino gloriam et laudem eius in insulis nuntiabunt
- <sup>13</sup> Dominus sicut fortis egredietur sicut vir proelior suscitabit zelum vociferabitur et clamabit super inimicos suos confortabitur
- <sup>14</sup> tacui semper silui patiens fui sicut pariens loquar dissipabo et absorbebo simul
- <sup>15</sup> desertos faciam montes et colles et omne gramen eorum exsiccabo et ponam flumina in insulas et stagna arefaciam
- <sup>16</sup> et ducam caecos in via quam nesciunt in semitis quas ignoraverunt ambulare eos faciam ponam tenebras coram eis in lucem et prava in recta haec verba feci eis et non dereliqui eos
- <sup>17</sup> conversi sunt retrorsum confundantur confusione qui confidunt in sculptili qui dicunt conflatili vos dii nostri
- <sup>18</sup> surdi audite et caeci intuemini ad videndum
- <sup>19</sup> quis caecus nisi servus meus et surdus nisi ad quem nuntios meos misi quis caecus nisi qui venundatus est quis caecus nisi servus Domini
- <sup>20</sup> qui vides multa nonne custodies qui apertas habes aures nonne audies
- <sup>21</sup> et Dominus voluit ut sanctificaret eum et magnificaret legem et extolleret
- <sup>22</sup> ipse autem populus direptus et vastatus laqueus iuvenum omnes et in domibus carcerum absconditi sunt facti sunt in rapinam nec est qui eruat in direptionem et non est qui dicat redde
- <sup>23</sup> quis est in vobis qui audiat hoc adtendat et auscultet futura
- <sup>24</sup> quis dedit in direptionem Iacob et Israhel vastantibus nonne Dominus ipse cui peccavimus et noluerunt in viis eius ambulare et non audierunt legem eius
- <sup>25</sup> et effudit super eum indignationem furoris sui et forte bellum et conbusit eum in circuitu et non cognovit et succendit eum et non intellexit

## CAPITULUM 43

**E**t nunc haec dicit Dominus creans te Iacob et formans te Israel noli timere quia redemi te et vocavi nomine tuo meus es tu

**2** cum transieris per aquas tecum ero et flumina non operient te cum ambulaveris in igne non conbureris et flamma non ardebit in te

**3** quia ego Dominus Deus tuus Sanctus Israel salvator tuus dedi propitiationem tuam Aegyptum Aethiopiam et Saba pro te

**4** ex quo honorabilis factus es in oculis meis et gloriosus ego dilexi te et dabo homines pro te et populos pro anima tua

**5** noli timere quoniam tecum ego sum ab oriente adducam semen tuum et ab occidente congregabo te

**6** dicam aquiloni da et austro noli prohibere adfer filios meos de longinquo et filias meas ab extremis terrae

**7** et omnem qui invocat nomen meum in gloriam meam creavi eum et formavi eum et feci eum

**8** educ foras populum caecum et oculos habentem surdum et aures ei sunt

**9** omnes gentes congregatae sunt simul et collectae sunt tribus quis in vobis adnuntiet istud et quae prima sunt audire nos faciat dent testes eorum et iustificentur et audiant et dicant vere

**10** vos testes mei dicit Dominus et servus meus quem elegi ut sciatis et credatis mihi et intellegatis quia ego ipse sum ante me non est formatus deus et post me non erit

**11** ego sum ego sum Dominus et non est absque me salvator

**12** ego adnuntiavi et salvavi auditum feci et non fuit in vobis alienus vos testes mei dicit Dominus et ego Deus

**13** et ab initio ego ipse et non est qui de manu mea eruat operabor et quis avertet illud

**14** haec dicit Dominus redemptor vester Sanctus Israel propter vos emisi Babylonem et detraxi vectes universos et Chaldeos in navibus suis gloriantes

**15** ego Dominus Sanctus vester creans Israel Rex vester

**16** haec dicit Dominus qui dedit in mari viam et in aquis torrentibus semitam

**17** qui eduxit quadrigam et equum agmen et robustum simul obdormierunt nec resurgent contriti sunt quasi linum et extincti sunt

**18** ne memineritis priorum et antiqua ne intueamini

**19** ecce ego facio nova et nunc orientur utique cognoscetis ea ponam in deserto viam et in invio flumina

**20** glorificabit me bestia agri dracones et strutiones quia dedi in deserto aquas flumina in invio ut darem potum populo meo electo meo

**21** populum istum formavi mihi laudem meam narrabit

**22** non me invocasti Iacob nec laborasti in me Israel

**23** non obtulisti mihi arietem holocausti tui et victimis tuis non glorificasti me non te servire feci in oblatione nec laborem tibi praebui in ture

**24** non emisti mihi argento calamum et adipe victimarum tuarum non inebriasti me verumtamen servire me fecisti in peccatis tuis praebuisti mihi laborem in iniquitatibus tuis

**25** ego sum ego sum ipse qui deleo iniquitates tuas propter me et peccatorum tuorum non recordabor

- <sup>26</sup> reduc me in memoriam et iudicemur simul narra si quid habes ut iustificeris  
<sup>27</sup> pater tuus primus peccavit et interpretes tui praevaricati sunt in me  
<sup>28</sup> et contaminavi principes sanctos dedi ad internicionem Iacob et Israhel in blasphemiam

## CAPITULUM 44

- E**t nunc audi Iacob serve meus et Israhel quem elegi  
<sup>2</sup> haec dicit Dominus faciens et formans te ab utero auxiliator tuus noli timere serve meus Iacob et Rectissime quem elegi  
<sup>3</sup> effundam enim aquas super sitientem et fluenta super aridam effundam spiritum meum super semen tuum et benedictionem meam super stirpem tuam  
<sup>4</sup> et germinabunt inter herbas quasi salices iuxta praeterfluentes aquas  
<sup>5</sup> iste dicet Domini ego sum et ille vocabit in nomine Iacob et hic scribet manu sua Domino et in nomine Israhel adsimilabitur  
<sup>6</sup> haec dicit Dominus rex Israhel et redemptor eius Dominus exercituum ego primus et ego novissimus et absque me non est deus  
<sup>7</sup> quis similis mei vocet et adnuntiet et ordinem exponat mihi ex quo constitui populum antiquum ventura et quae futura sunt adnuntient eis  
<sup>8</sup> nolite timere neque conturbemini ex tunc audire te feci et adnuntiavi vos estis testes mei numquid est deus absque me et formator quem ego non noverim  
<sup>9</sup> plastae idoli omnes nihil sunt et amantissima eorum non proderunt eis ipsi sunt testes eorum quia non vident neque intellegunt ut confundantur  
<sup>10</sup> quis formavit deum et sculptile conflavit ad nihil utile  
<sup>11</sup> ecce omnes participes eius confundentur fabri enim sunt ex hominibus convenient omnes stabunt et pavebunt et confundentur simul  
<sup>12</sup> faber ferrarius lima operatus est in prunis et in malleis formavit illud et operatus est in brachio fortitudinis suae esuriet et deficiet non bibet aquam et lassescet  
<sup>13</sup> artifex lignarius extendit normam formavit illud in runcina fecit illud in angularibus et in circino tornavit illud et fecit imaginem viri quasi speciosum hominem habitantem in domo  
<sup>14</sup> succidit cedros tulit ilicem et quercum quae steterat inter ligna saltus plantavit pinum quam pluvia nutrit  
<sup>15</sup> et facta est hominibus in focum sumpsit ex eis et calefactus est et succendit et coxit panes de reliquo autem operatus est deum et adoravit fecit sculptile et curvatus est ante illud  
<sup>16</sup> medium eius conbusit igni et de medio eius carnes comedit coxit pulmentum et saturatus est et calefactus est et dixit va calefactus sum vidi focum  
<sup>17</sup> reliquum autem eius deum fecit sculptile sibi curvatur ante illud et adorat illud et obsecrat dicens libera me quia deus meus es tu  
<sup>18</sup> nescierunt neque intellexerunt lutati enim sunt ne videant oculi eorum et ne intellegant corde suo  
<sup>19</sup> non recogitant in mente sua neque cognoscunt neque sentiunt ut dicant medietatem eius conbusi igne et coxi super carbones eius panes coxi carnes et comedi et de reliquo eius idolum faciam ante truncum ligni procidam  
<sup>20</sup> pars eius cinis est cor insipiens adoravit illud et non liberabit animam suam neque dicet forte mendacium est in dextera mea  
<sup>21</sup> memento horum Iacob et Israhel quoniam servus meus es tu formavi te servus meus

es tu Israhel non oblivisceris mei

<sup>22</sup> delevi ut nubem iniquitates tuas et quasi nebulam peccata tua revertere ad me quoniam redemi te

<sup>23</sup> laudate caeli quoniam fecit Dominus iubilare extrema terrae resonare montes laudationem saltus et omne lignum eius quoniam redemit Dominus Iacob et Israhel gloriabitur

<sup>24</sup> haec dicit Dominus redemptor tuus et formator tuus ex utero ego sum Dominus faciens omnia extendens caelos solus stabiliens terram et nullus mecum

<sup>25</sup> irrita faciens signa divinatorum et ariolos in furorem vertens convertens sapientes retrorsum et scientiam eorum stultam faciens

<sup>26</sup> suscitans verbum servi sui et consilium nuntiorum suorum complens qui dico Hierusalem habitaberis et civitatibus Iuda aedificabimini et deserta eius suscitabo

<sup>27</sup> qui dico profundo desolare et flumina tua arefaciam

<sup>28</sup> qui dico Cyro pastor meus es et omnem voluntatem meam complebis qui dico Hierusalem aedificaberis et templo fundaberis

## CAPITULUM 45

**h**aec dicit Dominus christo meo Cyro cuius adprehendi dexteram ut subiciam ante faciem eius gentes et dorsa regum vertam et aperiam coram eo ianuas et portae non cludentur

<sup>2</sup> ego ante te ibo et gloriosos terrae humiliabo portas aereas conteram et vectes ferreos confringam

<sup>3</sup> et dabo tibi thesauros absconditos et arcana secretorum ut scias quia ego Dominus qui voco nomen tuum Deus Israhel

<sup>4</sup> propter servum meum Iacob et Israhel electum meum et vocavi te in nomine tuo adsimilavi te et non cognovisti me

<sup>5</sup> ego Dominus et non est amplius extra me non est deus accinxi te et non cognovisti me

<sup>6</sup> ut sciant hii qui ab ortu solis et qui ab occidente quoniam absque me non est ego Dominus et non est alter

<sup>7</sup> formans lucem et creans tenebras faciens pacem et creans malum ego Dominus faciens omnia haec

<sup>8</sup> rorate caeli desuper et nubes pluant iustum aperiatur terra et germinet salvatorem et iustitia oriatur simul ego Dominus creavi eum

<sup>9</sup> vae qui contradicit fictori suo testa de samiis terrae numquid dicet lutum figulo suo quid facis et opus tuum absque manibus est

<sup>10</sup> vae qui dicit patri quid generas et mulieri quid parturis

<sup>11</sup> haec dicit Dominus Sanctus Israhel plastes eius ventura interrogate me super filios meos et super opus manuum mearum mandastis mihi

<sup>12</sup> ego feci terram et hominem super eam creavi ego manus meae tetenderunt caelos et omni militiae eorum mandavi

<sup>13</sup> ego suscitavi eum ad iustitiam et omnes vias eius dirigam ipse aedificabit civitatem meam et captivitatem meam dimittet non in pretio neque in muneribus dicit Dominus Deus exercituum

<sup>14</sup> haec dicit Dominus labor Aegypti et negotiatio Aethiopiae et Sabaim viri sublimes ad te transibunt et tui erunt post te ambulabunt vincti manicis pergent et te adorabunt teque



deprecabuntur tantum in te est Deus et non est absque te deus

**15** vere tu es Deus absconditus Deus Israhel salvator

**16** confusi sunt et erubuerunt omnes simul abierunt in confusione fabricatores errorum

**17** Israhel salvatus est in Domino salute aeterna non confundemini et non erubescetis usque in saeculum saeculi

**18** quia haec dicit Dominus creans caelos ipse Deus formans terram et faciens eam ipse plastes eius non in vanum creavit eam ut habitetur formavit eam ego Dominus et non est alius

**19** non in abscondito locutus sum in loco terrae tenebroso non dixi semini Iacob frustra quaerite me ego Dominus loquens iustitiam adnuntians recta

**20** congregamini et venite et accedite simul qui salvati estis ex gentibus nescierunt qui levant lignum sculpturae suae et rogant deum non salvantem

**21** adnuntiate et venite et consiliamini simul quis auditum fecit hoc ab initio ex tunc praedixit illud numquid non ego Dominus et non est ultra Deus absque me Deus iustus et salvans non est praeter me

**22** convertimini ad me et salvi eritis omnes fines terrae quia ego Deus et non est alius

**23** in memet ipso iuravi egredietur de ore meo iustitiae verbum et non revertetur quia mihi curvabunt omnia genu et iurabit omnis lingua

**24** ergo in Domino dicet meae sunt iustitiae et imperium ad eum venient et confundentur omnes qui repugnant ei

**25** in Domino iustificabitur et laudabitur omne semen Israhel

## CAPITULUM 46

**C**onflatus est Bel contritus est Nabo facta sunt simulacra eorum bestiis et iumentis onera vestra gravi pondere usque ad lassitudinem

**2** contabuerunt et contrita sunt simul non potuerunt salvare portantem et anima eorum in captivitatem ibit

**3** audite me domus Iacob et omne residuum domus Israhel qui portamini a meo utero qui gestamini a mea vulva

**4** usque ad senectam ego ipse et usque ad canos ego portabo ego feci et ego feram et ego portabo et salvabo

**5** cui adsimilastis me et adaequastis et comparastis me et fecistis similem

**6** qui confertis aurum de sacculo et argentum statera ponderatis conducentes aurificem ut faciat deum et procidunt et adorant

**7** portant illud in umeris gestantes et ponentes in loco suo et stabit ac de loco suo non movebitur sed et cum clamaverint ad eum non audiet de tribulatione non salvabit eos

**8** mementote istud et fundamini redite praevaricatores ad cor

**9** recordamini prioris saeculi quoniam ego sum Deus et non est ultra Deus nec est similis mei

**10** adnuntians ab exordio novissimum et ab initio quae necdum facta sunt dicens consilium meum stabit et omnis voluntas mea fiet

**11** vocans ab oriente avem et de terra longinqua virum voluntatis meae et locutus sum et adducam illud creavi et faciam illud

<sup>12</sup> audite me duro corde qui longe estis a iustitia

<sup>13</sup> prope feci iustitiam meam non elongabitur et salus mea non morabitur dabo in Sion salutem et Israheli gloriam meam

## CAPITULUM 47

**d**escende sede in pulverem virgo filia Babylon sede in terra non est solium filiae Chaldeorum quia ultra non vocaberis mollis et tenera

<sup>2</sup> tolle molam et mole farinam denuda turpitudinem tuam discoperi umerum revela crus transi flumina

<sup>3</sup> revelabitur ignominia tua et videbitur obprobrium tuum ultionem capiam et non resistet mihi homo

<sup>4</sup> redemptor noster Dominus exercituum nomen illius Sanctus Israhel

<sup>5</sup> sede tace et intra in tenebras filia Chaldeorum quia non vocaberis ultra domina regnorum

<sup>6</sup> iratus sum super populum meum contaminavi hereditatem meam et dedi eos in manu tua non posuisti eis misericordias super senem adgravasti iugum tuum valde

<sup>7</sup> et dixisti in sempiternum ero domina non posuisti haec super cor tuum neque recordata es novissimi tui

<sup>8</sup> et nunc audi haec delicata et habitans confidenter quae dicis in corde tuo ego sum et non est praeter me amplius non sedebo vidua et ignorabo sterilitatem

<sup>9</sup> venient tibi duo haec subito in die una sterilitas et viduitas universa venerunt super te propter multitudinem maleficiorum tuorum et propter duritiam incantatorum tuorum vehementem

<sup>10</sup> et fiduciam habuisti in malitia tua et dixisti non est qui videat me sapientia tua et scientia tua haec decepit te et dixisti in corde tuo ego sum et praeter me non est altera

<sup>11</sup> veniet super te malum et nescies ortum eius et inruet super te calamitas quam non poteris expiare veniet super te repente miseria quam nescies

<sup>12</sup> sta cum incantatoribus tuis et cum multitudine maleficiorum tuorum in quibus laborasti ab adolescentia tua si forte quid prosit tibi aut si possis fieri fortior

<sup>13</sup> defecisti in multitudine consiliorum tuorum stent et salvent te augures caeli qui contemplantur sidera et supputabant menses ut ex eis adnuntiarent ventura tibi

<sup>14</sup> ecce facti sunt quasi stipula ignis conbusit eos non liberabunt animam suam de manu flammae non sunt prunae quibus calefiant nec focus ut sedeant ad eum

<sup>15</sup> sic facta sunt tibi in quibuscumque laboraveras negotiatores tui ab adolescentia tua unusquisque in via sua erraverunt non est qui salvet te

## CAPITULUM 48

**a**udite hoc domus Iacob qui vocamini nomine Israhel et de aquis Iuda existis qui iuratis in nomine Domini et Dei Israhel recordamini non in veritate neque in iustitia

<sup>2</sup> de civitate enim sancta vocati sunt et super Deum Israhel constabiles sunt Dominus exercituum nomen eius

<sup>3</sup> priora ex tunc adnuntiavi et ex ore meo exierunt et audita feci ea repente operatus sum et venerunt

<sup>4</sup> scivi enim quia durus es tu et nervus ferreus cervix tua et frons tua aerea

- <sup>5</sup> praedixi tibi ex tunc antequam venirent indicavi tibi ne forte diceres idola mea fecerunt haec et sculptilia mea et conflatilia mandaverunt ista
- <sup>6</sup> quae audisti vide omnia vos autem non adnuntiastis audita feci tibi nova ex nunc et conservata quae nescis
- <sup>7</sup> nunc creata sunt et non ex tunc et ante diem et non audisti ea ne forte dicas ecce cognovi ea
- <sup>8</sup> neque audisti neque cognovisti neque ex tunc aperta est auris tua scio enim quia praevaricans praevaricabis et transgressorem ex ventre vocavi te
- <sup>9</sup> propter nomen meum longe faciam furorem meum et laude mea infrenabo te ne intereas
- <sup>10</sup> ecce excoxi te sed non quasi argentum elegi te in camino paupertatis
- <sup>11</sup> propter me propter me faciam ut non blasphemem et gloriam meam alteri non dabo
- <sup>12</sup> audi me Iacob et Israhel quem ego voco ego ipse ego primus et ego novissimus
- <sup>13</sup> manus quoque mea fundavit terram et dextera mea mensa est caelos ego vocabo eos et stabunt simul
- <sup>14</sup> congregamini omnes vos et audite quis de eis adnuntiavit haec Dominus dilexit eum faciet voluntatem suam in Babylone et brachium suum in Chaldeis
- <sup>15</sup> ego ego locutus sum et vocavi eum adduxi eum et directa est via eius
- <sup>16</sup> accedite ad me et audite hoc non a principio in abscondito locutus sum ex tempore antequam fieret ibi eram et nunc Dominus Deus misit me et spiritus eius
- <sup>17</sup> haec dicit Dominus redemptor tuus Sanctus Israhel ego Dominus Deus tuus docens te utilia gubernans te in via qua ambulas
- <sup>18</sup> utinam adtendisses mandata mea facta fuisset sicut flumen pax tua et iustitia tua sicut gurgites maris
- <sup>19</sup> et fuisset quasi harena semen tuum et stirps uteri tui ut lapilli eius non interisset et non fuisset adtritum nomen eius a facie mea
- <sup>20</sup> egredimini de Babylone fugite a Chaldeis in voce exultationis adnuntiate auditum facite hoc efferte illud usque ad extrema terrae dicite redemit Dominus servum suum Iacob
- <sup>21</sup> non sitierunt in deserto cum educeret eos aquam de petra produxit eis et scidit petram et fluxerunt aquae
- <sup>22</sup> non est pax dicit Dominus impiis

## CAPITULUM 49

- A**udite insulae et adtendite populi de longe Dominus ab utero vocavit me de ventre matris meae recordatus est nominis mei
- <sup>2</sup> et posuit os meum quasi gladium acutum in umbra manus suae protexit me et posuit me sicut sagittam electam in faretra sua abscondit me
- <sup>3</sup> et dixit mihi servus meus es tu Israhel quia in te gloriabor
- <sup>4</sup> et ego dixi in vacuum laboravi sine causa et vane fortitudinem meam consumpsi ergo iudicium meum cum Domino et opus meum cum Deo meo
- <sup>5</sup> et nunc dicit Dominus formans me ex utero servum sibi ut reducam Iacob ad eum et Israhel non congregabitur et glorificatus sum in oculis Domini et Deus meus factus est fortitudo mea
- <sup>6</sup> et dixit parum est ut sis mihi servus ad suscitandas tribus Iacob et feces Israhel convertendas dedi te in lucem gentium ut sis salus mea usque ad extremum terrae

<sup>7</sup> haec dicit Dominus redemptor Israhel Sanctus eius ad contemptibilem animam ad abominatam gentem ad servum dominorum reges videbunt et consurgent principes et adorabunt propter Dominum quia fidelis est et Sanctum Israhel qui elegit te

<sup>8</sup> haec dicit Dominus in tempore placito exaudivi te et in die salutis auxiliatus sum tui et servavi te et dedi te in foedus populi ut suscitares terram et possideres hereditates dissipatas

<sup>9</sup> ut diceres his qui vincti sunt exite et his qui in tenebris revelamini super vias pascentur et in omnibus planis pascua eorum

<sup>10</sup> non esurient neque sitient et non percutiet eos aestus et sol quia miserator eorum reget eos et ad fontes aquarum portabit eos

<sup>11</sup> et ponam omnes montes meos in viam et semitae meae exaltabuntur

<sup>12</sup> ecce isti de longe venient et ecce illi ab aquilone et mari et isti de terra australi

<sup>13</sup> laudate caeli et exulta terra iubilate montes laudem quia consolatus est Dominus populum suum et pauperum suorum miserebitur

<sup>14</sup> et dixit Sion dereliquit me Dominus et Dominus oblitus est mei

<sup>15</sup> numquid oblivisci potest mulier infantem suum ut non misereatur filio uteri sui et si illa oblita fuerit ego tamen non obliviscar tui

<sup>16</sup> ecce in manibus meis descripsi te muri tui coram oculis meis semper

<sup>17</sup> venerunt structores tui destruentes te et dissipantes a te exhibunt

<sup>18</sup> leva in circuitu oculos tuos et vide omnes isti congregati sunt venerunt tibi vivo ego dicit Dominus quia omnibus his velut ornamento vestieris et circumdabis tibi eos quasi sponsa

<sup>19</sup> quia deserta tua et solitudines tuae et terra ruinae tuae nunc angusta erunt prae habitatoribus et longe fugabuntur qui absorbebant te

<sup>20</sup> adhuc dicent in auribus tuis filii sterilitatis tuae angustus mihi est locus fac spatium mihi ut habitem

<sup>21</sup> et dices in corde tuo quis genuit mihi istos ego sterilis et non pariens transmigrata et captiva et istos quis enutrivit ego destituta et sola et isti ubi hic erant

<sup>22</sup> haec dicit Dominus Deus ecce levo ad gentes manum meam et ad populos exaltabo signum meum et adferent filios tuos in ulnis et filias tuas super umeros portabunt

<sup>23</sup> et erunt reges nutricii tui et reginae nutrices tuae vultu in terra dimisso adorabunt te et pulverem pedum tuorum lingent et scies quia ego Dominus super quo non confundentur qui expectant eum

<sup>24</sup> numquid tolletur a forte praeda aut quod captum fuerit a robusto salvum esse poterit

<sup>25</sup> quia haec dicit Dominus equidem et captivitas a forte tolletur et quod ablatum fuerit a robusto salvabitur eos vero qui iudicaverunt te ego iudicabo et filios tuos ego salvabo

<sup>26</sup> et cibabo hostes tuos carnibus suis et quasi musto sanguine suo inebriabuntur et sciet omnis caro quia ego Dominus salvans te et redemptor tuus Fortis Iacob

## CAPITULUM 50

**h**aec dicit Dominus quis est hic liber repudii matris vestrae quo dimisi eam aut quis est creditor meus cui vendidi vos ecce in iniquitatibus vestris venditi estis et in sceleribus vestris dimisi matrem vestram

<sup>2</sup> quia veni et non erat vir vocavi et non erat qui audiret numquid abbreviata et parvula facta est manus mea ut non possim redimere aut non est in me virtus ad liberandum ecce in increpatione mea desertum faciam mare ponam flumina in siccum computrescent pisces

sine aqua et morientur in siti

<sup>3</sup> induam caelos tenebris et saccum ponam operimentum eorum

<sup>4</sup> Dominus dedit mihi linguam eruditam ut sciam sustentare eum qui lassus est verbo erigit mane mane erigit mihi aurem ut audiam quasi magistrum

<sup>5</sup> Dominus Deus aperuit mihi aurem ego autem non contradico retrorsum non abii

<sup>6</sup> corpus meum dedi percutientibus et genas meas vellentibus faciem meam non averti ab increpantibus et conspuentibus

<sup>7</sup> Dominus Deus auxiliator meus ideo non sum confusus ideo posui faciem meam ut petram durissimam et scio quoniam non confundar

<sup>8</sup> iuxta est qui iustificat me quis contradicet mihi stemus simul quis est adversarius meus accedat ad me

<sup>9</sup> ecce Dominus Deus auxiliator meus quis est qui condemnet me ecce omnes quasi vestimentum conterentur tinea comedet eos

<sup>10</sup> quis ex vobis timens Dominum audiens vocem servi sui qui ambulavit in tenebris et non est lumen ei speret in nomine Domini et innitatur super Deum suum

<sup>11</sup> ecce omnes vos accendentes ignem accincti flammis ambulate in lumine ignis vestri et in flammis quas succendistis de manu mea factum est hoc vobis in doloribus dormietis

## CAPITULUM 51

**a**udite me qui sequimini quod iustum est et quaeritis Dominum adtendite ad petram unde excisi estis et ad cavernam laci de qua praecisi estis

<sup>2</sup> adtendite ad Abraham patrem vestrum et ad Sarram quae peperit vos quia unum vocavi eum et benedixi ei et multiplicavi eum

<sup>3</sup> consolabitur ergo Dominus et Sion consolabitur omnes ruinas eius et ponet desertum eius quasi delicias et solitudinem eius quasi hortum Domini gaudium et laetitia invenietur in ea gratiarum actio et vox laudis

<sup>4</sup> adtendite ad me populus meus et tribus mea me audite quia lex a me exiit et iudicium meum in lucem populorum requiescet

<sup>5</sup> prope est iustus meus egressus est salvator meus et brachia mea populos iudicabunt me insulae expectabunt et brachium meum sustinebunt

<sup>6</sup> levate in caelum oculos vestros et videte sub terra deorsum quia caeli sicut fumus liquescent et terra sicut vestimentum adteretur et habitatores eius sicut haec interibunt salus autem mea in sempiternum erit et iustitia mea non deficiet

<sup>7</sup> audite me qui scitis iustum populus lex mea in corde eorum nolite timere obprobrium hominum et blasphemias eorum ne metuatis

<sup>8</sup> sicut enim vestimentum sic comedet eos vermis et sicut lanam sic devorabit eos tinea salus autem mea in sempiternum erit et iustitia mea in generationes generationum

<sup>9</sup> consurge consurge induere fortitudinem brachium Domini consurge sicut in diebus antiquis in generationibus saeculorum numquid non tu percussisti superbum vulnerasti draconem

<sup>10</sup> numquid non tu siccasti mare aquam abyssi vehementis qui posuisti profundum maris viam ut transirent liberati

<sup>11</sup> et nunc qui redempti sunt a Domino revertentur et venient in Sion laudantes et laetitia sempiterna super capita eorum gaudium et laetitiam tenebunt fugiet dolor et gemitus

<sup>12</sup> ego ego ipse consolabor vos quis tu ut timeres ab homine mortali et a filio hominis qui

quasi faenum ita arescet

**13** et oblitus es Domini factoris tui qui tetendit caelos et fundavit terram et formidasti iugiter tota die a facie furoris eius qui te tribulabat et paraverat ad perdendum ubi nunc est furor tribulantis

**14** cito veniet gradiens ad aperiendum et non interficiet usque ad internicionem nec deficiet panis eius

**15** ego autem sum Dominus Deus tuus qui conturbo mare et intumescunt fluctus eius Dominus exercituum nomen meum

**16** posui verba mea in ore tuo et in umbra manus meae protexi te ut plantes caelos et fundes terram et dicas ad Sion populus meus es tu

**17** elevare elevare consurge Hierusalem quae bibisti de manu Domini calicem irae eius usque ad fundum calicis soporis bibisti et epotasti usque ad feces

**18** non est qui sustentet eam ex omnibus filiis quos genuit et non est qui adprehendat manum eius ex omnibus filiis quos enutrivit

**19** duo sunt quae occurrerunt tibi quis contristabitur super te vastitas et contritio et fames et gladius quis consolabitur te

**20** filii tui proiecti sunt dormierunt in capite omnium viarum sicut bestia inlaqueata pleni indignatione Domini increpatione Dei tui

**21** idcirco audi hoc paupercula et ebria non a vino

**22** haec dicit Dominator tuus Dominus et Deus tuus qui pugnavit pro populo suo ecce tuli de manu tua calicem soporis fundum calicis indignationis meae non adicies ut bibas illud ultra

**23** et ponam illud in manu eorum qui te humiliaverunt et dixerunt animae tuae incurvare ut transeamus et posuisti ut terram corpus tuum et quasi viam transeuntibus

## CAPITULUM 52

**C**onsurge consurge induere fortitudine tua Sion induere vestimentis gloriae tuae Hierusalem civitas sancti quia non adicies ultra ut pertranseat per te incircumcisis et inmundus

**2** excutere de pulvere consurge sede Hierusalem solve vincula colli tui captiva filia Sion

**3** quia haec dicit Dominus gratis venundati estis et sine argento redimemini

**4** quia haec dicit Dominus Deus in Aegyptum descendit populus meus in principio ut colonus esset ibi et Assur absque ulla causa calumniatus est eum

**5** et nunc quid mihi est hic dicit Dominus quoniam ablati sunt populus meus gratis dominatores eius inique agunt dicit Dominus et iugiter tota die nomen meum blasphematur

**6** propter hoc sciet populus meus nomen meum in die illa quia ego ipse qui loquebar ecce adsum

**7** quam pulchri super montes pedes adnuntiantis et praedicantis pacem adnuntiantis bonum praedicantis salutem dicentis Sion regnavit Deus tuus

**8** vox speculatorum tuorum levaverunt vocem simul laudabunt quia oculum ad oculum videbunt cum converterit Dominus Sion

**9** gaudete et laudate simul deserta Hierusalem quia consolatus est Dominus populum suum redemit Hierusalem

**10** paravit Dominus brachium sanctum suum in oculis omnium gentium et videbunt omnes

fines terrae salutare Dei nostri

**11** recedite recedite exite inde pollutum nolite tangere exite de medio eius mundamini qui fertis vasa Domini

**12** quoniam non in tumultu exhibitis nec in fuga properabitis praecedet enim vos Dominus et congregabit vos Deus Israhel

**13** ecce intelletget servus meus exaltabitur et elevabitur et sublimis erit valde

**14** sicut obstipuerunt super te multi sic inglorius erit inter viros aspectus eius et forma eius inter filios hominum

**15** iste asperget gentes multas super ipsum continebunt reges os suum quia quibus non est narratum de eo viderunt et qui non audierunt contemplati sunt

## CAPITULUM 53

**Q**uis credidit auditui nostro et brachium Domini cui revelatum est

**2** et ascendet sicut virgultum coram eo et sicut radix de terra sitiendi non est species ei neque decor et vidimus eum et non erat aspectus et desideravimus eum

**3** despectum et novissimum virorum virum dolorum et scientem infirmitatem et quasi absconditus vultus eius et despectus unde nec reputavimus eum

**4** vere languores nostros ipse tulit et dolores nostros ipse portavit et nos putavimus eum quasi leprosum et percussum a Deo et humiliatum

**5** ipse autem vulneratus est propter iniquitates nostras adtritum est propter scelera nostra disciplina pacis nostrae super eum et livore eius sanati sumus

**6** omnes nos quasi oves erravimus unusquisque in viam suam declinavit et Dominus posuit in eo iniquitatem omnium nostrum

**7** oblatus est quia ipse voluit et non aperuit os suum sicut ovis ad occisionem ducetur et quasi agnus coram tondente obmutescet et non aperiet os suum

**8** de angustia et de iudicio sublatus est generationem eius quis enarrabit quia abscisus est de terra viventium propter scelus populi mei percussit eum

**9** et dabit impios pro sepultura et divitem pro morte sua eo quod iniquitatem non fecerit neque dolus fuerit in ore eius

**10** et Dominus voluit conterere eum in infirmitate si posuerit pro peccato animam suam videbit semen longevum et voluntas Domini in manu eius dirigetur

**11** pro eo quod laboravit anima eius videbit et saturabitur in scientia sua iustificabit ipse iustus servus meus multos et iniquitates eorum ipse portabit

**12** ideo dispertiam ei plurimos et fortium dividet spolia pro eo quod tradidit in morte animam suam et cum sceleratis reputatus est et ipse peccatum multorum tulit et pro transgressoribus rogavit

## CAPITULUM 54

**L**auda sterilis quae non paris decanta laudem et hinni quae non pariebas quoniam multi filii desertae magis quam eius quae habebat virum dicit Dominus

**2** dilata locum tentorii tui et pelles tabernaculorum tuorum extende ne parcas longos fac funiculos tuos et clavos tuos consolida

**3** ad dexteram enim et ad levam penetrabis et semen tuum gentes hereditabit et civitates desertas inhabitabit



- <sup>4</sup> noli timere quia non confunderis neque erubescas non enim te pudebit quia confusionis adulescentiae tuae oblivisceris et obprobrii viduitatis tuae non recordaberis amplius
- <sup>5</sup> quia dominabitur tui qui fecit te Dominus exercituum nomen eius et redemptor tuus Sanctus Israhel Deus omnis terrae vocabitur
- <sup>6</sup> quia ut mulierem derelictam et maerentem spiritu vocavit te Dominus et uxorem ab adulescentia abiectam dixit Deus tuus
- <sup>7</sup> ad punctum in modico dereliqui te et in miserationibus magnis congregabo te
- <sup>8</sup> in momento indignationis abscondi faciem meam parumper a te et in misericordia sempiterna misertus sum tui dixit redemptor tuus Dominus
- <sup>9</sup> sicut in diebus Noe istud mihi est cui iuravi ne inducerem aquas Noe ultra super terram sic iuravi ut non irascar tibi et non increpem te
- <sup>10</sup> montes enim commovebuntur et colles contremescent misericordia autem mea non recedet et foedus pacis meae non movebitur dixit miserator tuus Dominus
- <sup>11</sup> paupercula tempestate convulsa absque ulla consolatione ecce ego sternam per ordinem lapides tuos et fundabo te in sapphyris
- <sup>12</sup> et ponam iaspidem propugnacula tua et portas tuas in lapides sculptos et omnes terminos tuos in lapides desiderabiles
- <sup>13</sup> universos filios tuos doctos a Domino et multitudinem pacis filiis tuis
- <sup>14</sup> et in iustitia fundaberis recede procul a calumnia quia non timebis et a pavore quia non adpropinquabit tibi
- <sup>15</sup> ecce accola veniet qui non erat mecum advena quondam tuus adiungetur tibi
- <sup>16</sup> ecce ego creavi fabrum sufflantem in igne prunas et proferentem vas in opus suum et ego creavi interfectorem ad disperdendum
- <sup>17</sup> omne vas quod fictum est contra te non dirigetur et omnem linguam resistentem tibi in iudicio iudicabis haec hereditas servorum Domini et iustitia eorum apud me dicit Dominus

## CAPITULUM 55

- O** omnes sitientes venite ad aquas et qui non habetis argentum properate emite et comedite venite emite absque argento et absque ulla commutatione vinum et lac
- <sup>2</sup> quare adpenditis argentum non in panibus et laborem vestrum non in saturitate audite audientes me et comedite bonum et delectabitur in crassitudine anima vestra
- <sup>3</sup> inclinate aurem vestram et venite ad me audite et vivet anima vestra et feriam vobis pactum sempiternum misericordias David fideles
- <sup>4</sup> ecce testem populis dedi eum ducem ac praeceptorem gentibus
- <sup>5</sup> ecce gentem quam nesciebas vocabis et gentes quae non cognoverunt te ad te current propter Dominum Deum tuum et Sanctum Israhel quia glorificavit te
- <sup>6</sup> quaerite Dominum dum inveniri potest invocate eum dum prope est
- <sup>7</sup> derelinquat impius viam suam et vir iniquus cogitationes suas et revertatur ad Dominum et miserebitur eius et ad Deum nostrum quoniam multus est ad ignoscendum
- <sup>8</sup> non enim cogitationes meae cogitationes vestrae neque viae vestrae viae meae dicit Dominus
- <sup>9</sup> quia sicut exaltantur caeli a terra sic exaltatae sunt viae meae a viis vestris et cogitationes meae a cogitationibus vestris
- <sup>10</sup> et quomodo descendit imber et nix de caelo et illuc ultra non revertitur sed inebriat terram et infundit eam et germinare eam facit et dat semen serenti et panem comedenti



- <sup>11</sup> sic erit verbum meum quod egredietur de ore meo non revertetur ad me vacuum sed faciet quaecumque volui et prosperabitur in his ad quae misi illud
- <sup>12</sup> quia in laetitia egrediemini et in pace deducemini montes et colles cantabunt coram vobis laudem et omnia ligna regionis plaudent manu
- <sup>13</sup> pro salionca ascendet abies et pro urtica crescet myrtus et erit Dominus nominatus in signum aeternum quod non auferetur

## CAPITULUM 56

- h**aec dicit Dominus custodite iudicium et facite iustitiam quia iuxta est salus mea ut veniat et iustitia mea ut reveletur
- <sup>2</sup> beatus vir qui facit hoc et filius hominis qui adprehendit istud custodiens sabbatum ne polluat illud custodiens manus suas ne faciat omne malum
- <sup>3</sup> et non dicat filius advenae qui adheret Domino dicens separatione dividet me Dominus a populo suo et non dicat eunuchus ecce ego lignum aridum
- <sup>4</sup> quia haec dicit Dominus eunuchis qui custodierint sabbata mea et elegerint quae volui et tenuerint foedus meum
- <sup>5</sup> dabo eis in domo mea et in muris meis locum et nomen melius a filiis et filiabus nomen sempiternum dabo eis quod non peribit
- <sup>6</sup> et filios advenae qui adherent Domino ut colant eum et diligant nomen eius ut sint ei in servos omnem custodientem sabbatum ne polluat illud et tenentem foedus meum
- <sup>7</sup> adducam eos in montem sanctum meum et laetificabo eos in domo orationis meae holocausta eorum et victimae eorum placebunt mihi super altari meo quia domus mea domus orationis vocabitur cunctis populis
- <sup>8</sup> ait Dominus Deus qui congregat dispersos Israhel adhuc congregabo ad eum congregatos eius
- <sup>9</sup> omnes bestiae agri venite ad devorandum universae bestiae saltus
- <sup>10</sup> speculatores eius caeci omnes nescierunt universi canes muti non valentes latrare videntes vana dormientes et amantes somnia
- <sup>11</sup> et canes inpuidentissimi nescierunt saturitatem ipsi pastores ignoraverunt intellegentiam omnes in viam suam declinaverunt unusquisque ad avaritiam suam a summo usque ad novissimum
- <sup>12</sup> venite sumamus vinum et impleamur ebrietate et erit sicut hodie sic et cras et multo amplius

## CAPITULUM 57

- i**ustus perit et nemo est qui recogitet in corde suo et viri misericordiae colliguntur quia non est qui intellegat a facie enim malitiae collectus est iustus
- <sup>2</sup> veniat pax requiescat in cubili suo qui ambulavit in directione sua
- <sup>3</sup> vos autem accedite huc filii auguratricis semen adulteri et fornicariae
- <sup>4</sup> super quem lusistis super quem dilatastis os et eiecistis linguam numquid non vos filii scelesti semen mendax
- <sup>5</sup> qui consolamini in diis subter omne lignum frondosum immolantes parvulos in torrentibus subter imminentes petras
- <sup>6</sup> in partibus torrentis pars tua haec est sors tua et ipsis effudisti libamen obtulisti

sacrificium numquid super his non indignabor

<sup>7</sup> super montem excelsum et sublimem posuisti cubile tuum et illuc ascendisti ut immolares hostias

<sup>8</sup> et post ostium et retro postem posuisti memoriale tuum quia iuxta me discoperuisti et suscepisti adulterum dilatasti cubile tuum et pepigisti cum eis dilexisti stratum eorum manu aperta

<sup>9</sup> et ornasti te regi unguento et multiplicasti pigmenta tua misisti legatos tuos procul et humiliata es usque ad inferos

<sup>10</sup> in multitudine viae tuae laborasti non dixisti quiescam vitam manus tuae invenisti propterea non rogasti

<sup>11</sup> pro quo sollicita timuisti quia mentita es et mei non es recordata neque cogitasti in corde tuo quia ego tacens et quasi non videns et mei oblita es

<sup>12</sup> ego adnuntiabo iustitiam tuam et opera tua non proderunt tibi

<sup>13</sup> cum clamaveris liberent te congregati tui et omnes eos auferet ventus tollet aura qui autem fiduciam habet mei hereditabit terram et possidebit montem sanctum meum

<sup>14</sup> et dicam viam facite praebete iter declinate de semita auferte offendicula de via populi mei

<sup>15</sup> quia haec dicit Excelsus et Sublimis habitans aeternitatem et sanctum nomen eius in excelso et in sancto habitans et cum contrito et humili spiritu ut vivificet spiritum humilium et vivificet cor contritorum

<sup>16</sup> non enim in sempiternum litigabo neque usque ad finem irascar quia spiritus a facie mea egredietur et flatus ego faciam

<sup>17</sup> propter iniquitatem avaritiae eius iratus sum et percussi eum abscondi et indignatus sum et abiit vagus in via cordis sui

<sup>18</sup> vias eius vidi et dimisi eum et reduxi eum et reddidi consolationes ipsi et lugentibus eius

<sup>19</sup> creavi fructum labiorum pacem pacem ei qui longe est et qui prope dixit Dominus et sanavi eum

<sup>20</sup> impii autem quasi mare fervens quod quiescere non potest et redundant fluctus eius in conculcationem et lutum

<sup>21</sup> non est pax dixit Deus meus impiis

## CAPITULUM 58

**C**lama ne cesses quasi tuba exalta vocem tuam et adnuntia populo meo scelera eorum et domui Iacob peccata eorum

<sup>2</sup> me etenim de die in diem quaerunt et scire vias meas volunt quasi gens quae iustitiam fecerit et quae iudicium Dei sui non reliquerit rogant me iudicia iustitiae adpropinquare Deo volunt

<sup>3</sup> quare ieiunavimus et non aspexisti humiliavimus animam nostram et nescisti ecce in die ieiunii vestri invenitur voluntas et omnes debitores vestros repetitis

<sup>4</sup> ecce ad lites et contentiones ieiunatis et percutitis pugno impie nolite ieiunare sicut usque ad hanc diem ut audiatur in excelso clamor vester

<sup>5</sup> numquid tale est ieiunium quod elegi per diem adfligere hominem animam suam numquid contorquere quasi circulum caput suum et saccum et cinerem sternere numquid istud vocabis ieiunium et diem acceptabilem Domino

<sup>6</sup> nonne hoc est magis ieiunium quod elegi dissolve conligationes impietatis solve

fasciculos deprimentes dimitte eos qui confracti sunt liberos et omne onus disrumpe

<sup>7</sup> frange esurienti panem tuum et egenos vagosque induc in domum tuam cum videris nudum operi eum et carnem tuam ne despexeris

<sup>8</sup> tunc erumpet quasi mane lumen tuum et sanitas tua citius orietur et anteibit faciem tuam iustitia tua et gloria Domini colliget te

<sup>9</sup> tunc invocabis et Dominus exaudiet clamabis et dicet ecce adsum si abstuleris de medio tui catenam et desieris digitum extendere et loqui quod non prodest

<sup>10</sup> cum effuderis esurienti animam tuam et animam adflictam repleveris orietur in tenebris lux tua et tenebrae tuae erunt sicut meridies

<sup>11</sup> et requiem tibi dabit Dominus semper et implebit splendoribus animam tuam et ossa tua liberabit et eris quasi hortus irriguus et sicut fons aquarum cuius non deficient aquae

<sup>12</sup> et aedificabuntur in te deserta saeculorum fundamenta generationis et generationis suscitabis et vocaberis aedificator sepium avertens semitas in quietem

<sup>13</sup> si averteris a sabbato pedem tuum facere voluntatem tuam in die sancto meo et vocaveris sabbatum delicatum et sanctum Domini gloriosum et glorificaveris eum dum non facis vias tuas et non invenitur voluntas tua ut loquaris sermonem

<sup>14</sup> tunc delectaberis super Domino et sustollam te super altitudines terrae et cibabo te hereditate Iacob patris tui os enim Domini locutum est

## CAPITULUM 59

**E**cce non est abbreviata manus Domini ut salvare nequeat neque adgravata est auris eius ut non exaudiat

<sup>2</sup> sed iniquitates vestrae diviserunt inter vos et Deum vestrum et peccata vestra absconderunt faciem eius a vobis ne exaudiret

<sup>3</sup> manus enim vestrae pollutae sunt sanguine et digiti vestri iniquitate labia vestra locuta sunt mendacium et lingua vestra iniquitatem fatur

<sup>4</sup> non est qui invocet iustitiam neque est qui iudicet vere sed confidunt in nihili et loquuntur vanitates conceperunt laborem et pepererunt iniquitatem

<sup>5</sup> ova aspidum ruperunt et telas aranae texuerunt qui comederit de ovis eorum morietur et quod confotum est erumpet in regulum

<sup>6</sup> telae eorum non erunt in vestimentum neque operientur operibus suis opera eorum opera inutilia et opus iniquitatis in manibus eorum

<sup>7</sup> pedes eorum ad malum currunt et festinant ut effundant sanguinem innocentem cogitationes eorum cogitationes inutiles vastitas et contritio in viis eorum

<sup>8</sup> viam pacis nescierunt et non est iudicium in gressibus eorum semitae eorum incurvatae sunt eis omnis qui calcat in ea ignorat pacem

<sup>9</sup> propter hoc elongatum est iudicium a nobis et non adprehendet nos iustitia expectavimus lucem et ecce tenebrae splendorem et in tenebris ambulavimus

<sup>10</sup> palpavimus sicut caeci parietem et quasi absque oculis adtrectavimus inpegimus meridie quasi in tenebris in caligosis quasi mortui

<sup>11</sup> rugiemus quasi ursi omnes et quasi columbae meditantes gememus expectavimus iudicium et non est salutem et elongata est a nobis

<sup>12</sup> multiplicatae sunt enim iniquitates nostrae coram te et peccata nostra responderunt nobis quia scelera nostra nobiscum et iniquitates nostras cognovimus

<sup>13</sup> peccare et mentiri contra Dominum et aversi sumus ne iremus post tergum Dei nostri ut

loqueremur calumniam et transgressionem concepimus et locuti sumus de corde verba mendacii

**14** et conversum est retrorsum iudicium et iustitia longe stetit quia corruit in platea veritas et aequitas non potuit ingredi

**15** et facta est veritas in oblivione et qui recessit a malo praedae patuit et vidit Dominus et malum apparuit in oculis eius quia non est iudicium

**16** et vidit quia non est vir et aporiatum est quia non est qui occurrat et salvavit sibi brachium suum et iustitia eius ipsa confirmavit eum

**17** indutus est iustitia ut lorica et galea salutis in capite eius indutus est vestimentis ultionis et opertus est quasi pallio zeli

**18** sicut ad vindictam quasi ad retributionem indignationis hostibus suis et vicissitudinem inimicis suis insulis vicem reddet

**19** et timebunt qui ab occidente nomen Domini et qui ab ortu solis gloriam eius cum venerit quasi fluvius violentus quem spiritus Domini cogit

**20** et venerit Sion redemptor et eis qui redeunt ab iniquitate in Iacob dicit Dominus

**21** hoc foedus meum cum eis dicit Dominus spiritus meus qui est in te et verba mea quae posui in ore tuo non recedent de ore tuo et de ore seminis tui et de ore seminis seminis tui dixit Dominus amodo et usque in sempiternum

## CAPITULUM 60

**S**urge inluminare quia venit lumen tuum et gloria Domini super te orta est

**2** quia ecce tenebrae operient terram et caligo populos super te autem orietur Dominus et gloria eius in te videbitur

**3** et ambulabunt gentes in lumine tuo et reges in splendore ortus tui

**4** leva in circuitu oculos tuos et vide omnes isti congregati sunt venerunt tibi filii tui de longe venient et filiae tuae in latere sugent

**5** tunc videbis et afflues et mirabitur et dilatabitur cor tuum quando conversa fuerit ad te multitudo maris fortitudo gentium venerit tibi

**6** inundatio camelorum operiet te dromedariae Madian et Efa omnes de Saba venient aurum et tus deferentes et laudem Domino adnuntiantes

**7** omne pecus Cedar congregabitur tibi arietes Nabaioth ministrabunt tibi offerentur super placabili altari meo et domum maiestatis meae glorificabo

**8** qui sunt isti qui ut nubes volant et quasi columbae ad fenestras suas

**9** me enim insulae expectant et naves maris in principio ut adducam filios tuos de longe argentum eorum et aurum eorum cum eis nomini Domini Dei tui et Sancto Israhel quia glorificavit te

**10** et aedificabunt filii peregrinorum muros tuos et reges eorum ministrabunt tibi in indignatione enim mea percussi te et in reconciliatione mea misertus sum tui

**11** et aperientur portae tuae iugiter die et nocte non claudentur ut adferatur ad te fortitudo gentium et reges earum adducantur

**12** gens enim et regnum quod non servierit tibi peribit et gentes solitudine vastabuntur

**13** gloria Libani ad te veniet abies et buxus et pinus simul ad ornandum locum sanctificationis meae et locum pedum meorum glorificabo

**14** et venient ad te curvi filii eorum qui humiliaverunt te et adorabunt vestigia pedum tuorum omnes qui detrahebant tibi et vocabunt te civitatem Domini Sion Sancti Israhel

- 15** pro eo quod fuisti derelicta et odio habita et non erat qui per te transiret ponam te in superbiam saeculorum gaudium in generationem et generationem
- 16** et suges lac gentium et mamilla regum lactaberis et scies quia ego Dominus salvans te et redemptor tuus Fortis Iacob
- 17** pro aere adferam aurum et pro ferro adferam argentum et pro lignis aes et pro lapidibus ferrum et ponam visitationem tuam pacem et praepositos tuos iustitiam
- 18** non audietur ultra iniquitas in terra tua vastitas et contritio in terminis tuis et occupabit salus muros tuos et portas tuas laudatio
- 19** non erit tibi amplius sol ad lucendum per diem nec splendor lunae inluminabit te sed erit tibi Dominus in lucem sempiternam et Deus tuus in gloriam tuam
- 20** non occidet ultra sol tuus et luna tua non minuetur quia Dominus erit in lucem sempiternam et conplebuntur dies luctus tui
- 21** populus autem tuus omnes iusti in perpetuum hereditabunt terram germen plantationis meae opus manus meae ad glorificandum
- 22** minimus erit in mille et parvulus in gentem fortissimam ego Dominus in tempore eius subito faciam istud

## CAPITULUM 61

- S**piritus Domini super me eo quod unxerit Dominus me ad adnuntiandum mansuetis misit me ut mederer contritis corde et praedicarem captivis indulgentiam et clausis apertionem
- 2** ut praedicarem annum placabilem Domini et diem ultionis Deo nostro ut consolarer omnes lugentes
- 3** ut ponerem lugentibus Sion et darem eis coronam pro cinere oleum gaudii pro luctu pallium laudis pro spiritu maeroris et vocabuntur in ea fortes iustitiae plantatio Domini ad glorificandum
- 4** et aedificabunt deserta a saeculo et ruinas antiquas erigent et instaurabunt civitates desertas dissipatas in generationem et generationem
- 5** et stabunt alieni et pascent pecora vestra et filii peregrinorum agricolae et vinitores vestri erunt
- 6** vos autem sacerdotes Domini vocabimini ministri Dei nostri dicetur vobis fortitudinem gentium comedetis et in gloria earum superbietis
- 7** pro confusione vestra duplici et rubore laudabunt partem eorum propter hoc in terra sua duplicia possidebunt laetitia sempiterna erit eis
- 8** quia ego Dominus diligens iudicium odio habens rapinam in holocausto et dabo opus eorum in veritate et foedus perpetuum feriam eis
- 9** et sciatur in gentibus semen eorum et germen eorum in medio populorum omnes qui viderint eos cognoscent eos quia isti sunt semen cui benedixit Dominus
- 10** gaudens gaudebo in Domino et exultabit anima mea in Deo meo quia induit me vestimentis salutis et indumento iustitiae circumdedit me quasi sponsum decoratum corona et quasi sponsam ornatam monilibus suis
- 11** sicut enim terra profert germen suum et sicut hortus semen suum germinat sic Dominus Deus germinabit iustitiam et laudem coram universis gentibus

## CAPITULUM 62

**P**ropter Sion non tacebo et propter Hierusalem non quiescam donec egrediatur ut splendor iustus eius et salvator eius ut lampas accendatur

<sup>2</sup> et videbunt gentes iustum tuum et cuncti reges inclitum tuum et vocabitur tibi nomen novum quod os Domini nominabit

<sup>3</sup> et eris corona gloriae in manu Domini et diadema regni in manu Dei tui

<sup>4</sup> non vocaberis ultra Derelicta et terra tua non vocabitur amplius Desolata sed vocaberis Voluntas mea in ea et terra tua Inhabitata quia conplacuit Domino in te et terra tua inhabitabitur

<sup>5</sup> habitabit enim iuvenis cum virgine et habitabunt in te filii tui et gaudebit sponsus super sponsam gaudebit super te Deus tuus

<sup>6</sup> super muros tuos Hierusalem constitui custodes tota die et tota nocte perpetuo non tacebunt qui reminiscimini Domini ne taceatis

<sup>7</sup> et ne detis silentium ei donec stabiliat et donec ponat Hierusalem laudem in terra

<sup>8</sup> iuravit Dominus in dextera sua et in brachio fortitudinis suae si dederit triticum tuum ultra cibum inimicis tuis et si biberint filii alieni vinum tuum in quo laborasti

<sup>9</sup> quia qui congregabunt illud comedent et laudabunt Dominum et qui conportant illud bibent in atriis sanctis meis

<sup>10</sup> transite transite per portas praeparate viam populo planum facite iter et eligite lapides elevate signum ad populos

<sup>11</sup> ecce Dominus auditum fecit in extremis terrae dicite filiae Sion ecce salvator tuus venit ecce merces eius cum eo et opus eius coram illo

<sup>12</sup> et vocabunt eos Populus sanctus Redempti a Domino tu autem vocaberis Quaesita civitas et non Derelicta

## CAPITULUM 63

**Q**uis est iste qui venit de Edom tinctis vestibus de Bosra iste formosus in stola sua gradiens in multitudine fortitudinis suae ego qui loquor iustitiam et propugnator sum ad salvandum

<sup>2</sup> quare ergo rubrum est indumentum tuum et vestimenta tua sicut calcantium in torculari

<sup>3</sup> torcular calcavi solus et de gentibus non est vir mecum calcavi eos in furore meo et conculcavi eos in ira mea et aspersus est sanguis eorum super vestimenta mea et omnia indumenta mea inquinavi

<sup>4</sup> dies enim ultionis in corde meo annus redemptionis meae venit

<sup>5</sup> circumspexi et non erat auxiliator quaesivi et non fuit qui adiuveret et salvavit mihi brachium meum et indignatio mea ipsa auxiliata est mihi

<sup>6</sup> et conculcavi populos in furore meo et inebriavi eos in indignatione mea et detraxi in terra virtutem eorum

<sup>7</sup> miserationum Domini recordabor laudem Domini super omnibus quae reddidit nobis Dominus et super multitudinem bonorum domui Israhel quae largitus est eis secundum indulgentiam suam et secundum multitudinem misericordiarum suarum

<sup>8</sup> et dixit verumtamen populus meus est filii non negantes et factus est eis salvator

<sup>9</sup> in omni tribulatione eorum non est tribulatus et angelus faciei eius salvavit eos in dilectione sua et in indulgentia sua ipse redemit eos et portavit eos et levavit eos cunctis diebus saeculi

<sup>10</sup> ipsi autem ad iracundiam provocaverunt et adflixerunt spiritum Sancti eius et conversus

est eis in inimicum et ipse debellavit eos

**11** et recordatus est dierum saeculi Mosi populi sui ubi est qui eduxit eos de mari cum pastoribus gregis sui ubi est qui posuit in medio eius spiritum Sancti sui

**12** qui eduxit ad dexteram Mosen brachio maiestatis suae qui scidit aquas ante eos ut faceret sibi nomen sempiternum

**13** qui duxit eos per abyssos quasi equum in deserto non inpingentem

**14** quasi animal in campo descendens spiritus Domini ductor eius fuit sic adduxisti populum tuum ut faceres tibi nomen gloriae

**15** adtende de caelo et vide de habitaculo sancto tuo et gloriae tuae ubi est zelus tuus et fortitudo tua multitudo viscerum tuorum et miserationum tuarum super me continuerunt se

**16** tu enim pater noster et Abraham nescivit nos et Israhel ignoravit nos tu Domine pater noster redemptor noster a saeculo nomen tuum

**17** quare errare nos fecisti Domine de viis tuis indurasti cor nostrum ne timeremus te convertere propter servos tuos tribus hereditatis tuae

**18** quasi nihilum possederunt populum sanctum tuum hostes nostri conculcaverunt sanctificationem tuam

**19** facti sumus quasi in principio cum non dominareris nostri neque invocaretur nomen tuum super nos

## CAPITULUM 64

**U**tinam disrumperes caelos et descenderes a facie tua montes defluerent

**2** sicut exustio ignis tabescerent aquae arderent igni ut notum fieret nomen tuum inimicis tuis a facie tua gentes turbarentur

**3** cum feceris mirabilia non sustinebimus descendisti et a facie tua montes defluerunt

**4** a saeculo non audierunt neque auribus perceperunt oculus non vidit Deus absque te quae praeparasti expectantibus te

**5** occurristi laetanti et facienti iustitiam in viis tuis recordabuntur tui ecce tu iratus es et peccavimus in ipsis fuimus semper et salvabimur

**6** et facti sumus ut immundus omnes nos quasi pannus menstruatae universae iustitiae nostrae et cecidimus quasi folium universi et iniquitates nostrae quasi ventus abstulerunt nos

**7** non est qui invocet nomen tuum qui consurgat et teneat te abscondisti faciem tuam a nobis et adlisisisti nos in manu iniquitatis nostrae

**8** et nunc Domine pater noster es tu nos vero lutum et fictor noster et opera manuum tuarum omnes nos

**9** ne irascaris Domine satis et ne ultra memineris iniquitatis ecce respice populus tuus omnes nos

**10** civitas sancti tui facta est deserta Sion deserta facta est Hierusalem desolata

**11** domus sanctificationis nostrae et gloriae nostrae ubi laudaverunt te patres nostri facta est in exustionem ignis et omnia desiderabilia nostra versa sunt in ruinas

**12** numquid super his continebis te Domine tacebis et adfliges nos vehementer

## CAPITULUM 65



**Q**uaesierunt me qui ante non interrogabant invenerunt qui non quaesierunt me dixi ecce ego ecce ego ad gentem quae non vocabat nomen meum

<sup>2</sup> expandi manus meas tota die ad populum incredulum qui graditur in via non bona post cogitationes suas

<sup>3</sup> populus qui ad iracundiam provocat me ante faciem meam semper qui immolant in hortis et sacrificant super lateres

<sup>4</sup> qui habitant in sepulchris et in delubris idolorum dormiunt qui comedunt carnem suillam et ius profanum in vasis eorum

<sup>5</sup> qui dicunt recede a me non adpropinques mihi quia immundus es isti fumus erunt in furore meo ignis ardens tota die

<sup>6</sup> ecce scriptum est coram me non tacebo sed reddam et retribuam in sinu eorum

<sup>7</sup> iniquitates vestras et iniquitates patrum vestrorum simul dicit Dominus qui sacrificaverunt super montes et super colles exprobraverunt mihi et remetiar opus eorum primum in sinu eorum

<sup>8</sup> haec dicit Dominus quomodo si inveniatur granum in botro et dicatur ne dissipis illud quoniam benedictio est sic faciam propter servos meos ut non disperdam totum

<sup>9</sup> et educam de Iacob semen et de Iuda possidentem montes meos et hereditabunt eam electi mei et servi mei habitabunt ibi

<sup>10</sup> et erunt campestria in caulas gregum et vallis Achor in cubile armentorum populo meo qui requisierunt me

<sup>11</sup> et vos qui dereliquistis Dominum qui obliti estis montem sanctum meum qui ponitis Fortunae mensam et libatis super eam

<sup>12</sup> numerabo vos in gladio et omnes in caede corruetis pro eo quod vocavi et non respondistis locutus sum et non audistis et faciebatis malum in oculis meis et quae nolui elegistis

<sup>13</sup> propter hoc haec dicit Dominus Deus ecce servi mei comedent et vos esurietis ecce servi mei bibent et vos sitietis

<sup>14</sup> ecce servi mei laetabuntur et vos confundemini ecce servi mei laudabunt prae exultatione cordis et vos clamabitis prae dolore cordis et prae contritione spiritus ululabitis

<sup>15</sup> et dimittetis nomen vestrum in iuramentum electis meis et interficiet te Dominus Deus et servos suos vocabit nomine alio

<sup>16</sup> in quo qui benedictus est super terram benedicetur in Deo amen et qui iurat in terra iurabit in Deo amen quia oblivioni traditae sunt angustiae priores et quia absconditae sunt ab oculis nostris

<sup>17</sup> ecce enim ego creo caelos novos et terram novam et non erunt in memoria priora et non ascendent super cor

<sup>18</sup> sed gaudebitis et exultabitis usque in sempiternum in his quae ego creo quia ecce ego creo Hierusalem exultationem et populum eius gaudium

<sup>19</sup> et exultabo in Hierusalem et gaudebo in populo meo et non audietur in eo ultra vox fletus et vox clamoris

<sup>20</sup> non erit ibi amplius infans dierum et senex qui non impleat dies suos quoniam puer centum annorum morietur et peccator centum annorum maledictus erit

<sup>21</sup> et aedificabunt domos et habitabunt et plantabunt vineas et comedent fructum earum

<sup>22</sup> non aedificabunt et alius habitabit non plantabunt et alius comedet secundum dies enim ligni erunt dies populi mei et opera manuum eorum inveterabunt

<sup>23</sup> electis meis non laborabunt frustra neque generabunt in conturbatione quia semen



benedictorum Domini est et nepotes eorum cum eis

<sup>24</sup> eritque antequam clament ego exaudiam adhuc illis loquentibus ego audiam

<sup>25</sup> lupus et agnus pascentur simul et leo et bos comedent paleas et serpenti pulvis panis eius non nocebunt neque occident in omni monte sancto meo dicit Dominus

## CAPITULUM 66

**h**aec dicit Dominus caelum sedis mea et terra scabillum pedum meorum quae ista domus quam aedificabitis mihi et quis iste locus quietis meae

<sup>2</sup> omnia haec manus mea fecit et facta sunt universa ista dicit Dominus ad quem autem respiciam nisi ad pauperculum et contritum spiritu et trementem sermones meos

<sup>3</sup> qui immolat bovem quasi qui interficiat virum qui mactat pecus quasi qui excerebret canem qui offert oblationem quasi qui sanguinem suillum offerat qui recordatur turis quasi qui benedicat idolo haec omnia elegerunt in viis suis et in abominationibus suis anima eorum delectata est

<sup>4</sup> unde et ego eligam inlusiones eorum et quae timebant adducam eis quia vocavi et non erat qui responderet locutus sum et non audierunt feceruntque malum in oculis meis et quae nolui elegerunt

<sup>5</sup> audite verbum Domini qui tremetis ad verbum eius dixerunt fratres vestri odientes vos et abicientes propter nomen meum glorificetur Dominus et videbimus in laetitia vestra ipsi autem confundentur

<sup>6</sup> vox populi de civitate vox de templo vox Domini reddentis retributionem inimicis suis

<sup>7</sup> antequam parturiret peperit antequam veniret partus eius peperit masculum

<sup>8</sup> quis audivit umquam tale et quis vidit huic simile numquid parturiet terra in die una aut parietur gens simul quia parturivit et peperit Sion filios suos

<sup>9</sup> numquid ego qui alios parere facio ipse non pariam dicit Dominus si ego qui generationem ceteris tribuo sterilis ero ait Dominus Deus tuus

<sup>10</sup> laetamini cum Hierusalem et exultate in ea omnes qui diligitis eam gaudete cum ea gaudio universi qui lugetis super eam

<sup>11</sup> ut sugatis et repleamini ab ubere consolationis eius ut mulgeatis et deliciis affluatis ab omnimoda gloria eius

<sup>12</sup> quia haec dicit Dominus ecce ego declinabo super eam quasi fluvium pacis et quasi torrentem inundantem gloriam gentium quam sugetis ad ubera portabimini et super genua blandientur vobis

<sup>13</sup> quomodo si cui mater blandiatur ita ego consolabor vos et in Hierusalem consolabimini

<sup>14</sup> videbitis et gaudebit cor vestrum et ossa vestra quasi herba germinabunt et cognoscetur manus Domini servis eius et indignabitur inimicis suis

<sup>15</sup> quia ecce Dominus in igne veniet et quasi turbo quadrigae eius reddere in indignatione furorem suum et increpationem suam in flamma ignis

<sup>16</sup> quia in igne Dominus diiudicatur et in gladio suo ad omnem carnem et multiplicabuntur interfecti a Domino

<sup>17</sup> qui sanctificabantur et mundos se putabant in hortis post unam intrinsecus qui comedebant carnem suillam et abominationem et murem simul consumentur dicit Dominus

<sup>18</sup> ego autem opera eorum et cogitationes eorum venio ut congregem cum omnibus gentibus et linguis et venient et videbunt gloriam meam

**19** et ponam in eis signum et mittam ex eis qui salvati fuerint ad gentes in mari in Africa in Lydia tenentes sagittam in Italiam et Graeciam ad insulas longe ad eos qui non audierunt de me et non viderunt gloriam meam et adnuntiabunt gloriam meam gentibus

**20** et adducent omnes fratres vestros de cunctis gentibus donum Domino in equis et in quadrigis et in lecticis et in mulis et in carrucis ad montem sanctum meum Hierusalem dicit Dominus quomodo si inferant filii Israhel munus in vase mundo in domum Domini

**21** et adsumam ex eis in sacerdotes et in Levitas dicit Dominus

**22** quia sicut caeli novi et terra nova quae ego facio stare coram me dicit Dominus sic stabit semen vestrum et nomen vestrum

**23** et erit mensis ex mense et sabbatum ex sabbato veniet omnis caro ut adoret coram facie mea dicit Dominus

**24** et egredientur et videbunt cadavera virorum qui praevaricati sunt in me vermis eorum non morietur et ignis eorum non extinguetur et erunt usque ad satietatem visionis omni carni

For other languages please go to **[www.wordproject.org](http://www.wordproject.org)**